

# NTWADISI



Mfumu kusakumuna nge, Mpangi Neville.

Mu ke na kiese mingi na kuvutuka na yinzo-Nzambi na nkokila yayi. Ndinga ya munu kele ya kukangama fioti. Mutindu ya Nsangu ya yinda na suka yayi, mpe mu kele na kiese mingi ti Yawu me vwanda, mutindu yina. Mpe munu mosi me yangalala na Yawu, kulonga Yawu, mpe mu banza ti beno me yangalala na kuwa Yawu. [Dibuundu me tuba, “Amen.”—Mu.]

<sup>2</sup> Ntangu yayi beno zimbana ve, beno bambuka moyo ntangu nionso yayi, ti bima yayi kele bima yina ke tungaka musadi ya Klisto. Beno me mona, ntete lukwikilu, na manima ngolo. Mpe beno bambuka moyo ntangu yayi ti, Mpeve-Santu lenda ve kufika yinzo ya Nzambi tii kuna bima yayi ke sala na Mpeve. Ata nionso yina beno lenda sala, beno me mona. Kele bima yina ke tungaka Nzutu ya Klisto, beno me mona, bima yina. Ntangu yayi, beno zimbana yawu ve, ti yayi *awa* kele ya ntete, ya kele lukwikilu ya beno. Ngolo, luzabu, mpe nionso yankaka, ba ke yika na yawu, tii nzutu nionso ya Klisto ke monisama, tii kuna Mpeve-Santu ke kwisa na zulu ya yawu mpe ke tula yawu kinieminu mutindu Nzutu mosi. Bima yayi fwana vwanda. Na yina, Yesu tubaka, “Ba ke zaba bawu na bambuma ya bawu.” Beno me mona, mbuma! Beno lenda vwanda ve na mbuma kana beno vwanda ve na bima yayi ke pesaka yawu. Mpe kuna ntangu nionso yayi ke baka kisika ya nkadulu ya yinza mpe—mpe ya masumu, mpe nionso yina, kuna kukondwa lukwikilu ke basika, kuna bima nionso ya yinza me kufwa, kuna kima yankaka kele ve kasi kivangu ya mona na Klisto. Mpe kuna Ephésiens 4:30 ke tuba, “Benoni yongisa ve Mpeve-Santu ya Nzambi, yina tulaka beno kinieminu tii na kilumbu ya beno ya mpulusu.” Ya kukangama na Kimfumu ya Nzambi! Ntangu yayi, beno zimbana yina ve. Beno bumba yawu na mabanza ntangu yayi, beno baka bima *yayi* ntete. Na yawu kinieminu kele Mpeve-Santu, Yimpu yina ke kanga beto na kati ya Nzutu. Mbote.

<sup>3</sup> Ntangu yayi beto kele na ndombolo ya Mpangi-kento Little, ya Chicago, bakala ya yandi kuzwaka kisumbula ya tomabilu mpe me kuma pene-pene na lufwa, Mpangi-kento Little. Mpe Edith Wright, mpangi ya beto ya kento ya fioti awa yina beto me zaba kubanda ntama, yandi ke na kimbevo, kimbevo ya ngolo, kuna na yinzo na nkokila yayi, mpe bawu zola ti ba zonzila yawu na dibuundu samu ti beto nionso kitwandi kusambila samu na ndombolo yango. Mpe ntangu yayi bika ti beto kulumusa bayintu ya beto na mwa ntangu fioti.

<sup>4</sup> Tata ya beto ya luzolo, ya Mazulu, beto me vukana (na nzila ya lukwikilu) pene-pene ya Kiti ya kimfumu ya Nzambi, mpe

beto ke na kulomba mawa ya Nzambi samu na bandombolo yayi. Mpangi-bakala Little, na kisumbula ya tomabilu, yina me kuma pene-pene na lufwa. Nzambi, sadisa yandi. Bika ti Mpeve-Santu kuvwanda pene-pene ya mbeto ya yandi mpe kuvutula beto yandi, Mfumu. Mpe Edith Wright ya leke yina me vwanda kuna, mu ke kusambila, Nzambi, ti Mpeve-Santu kuvwanda pene-pene ya mbeto ya yandi na nkokila yayi mpe vutula na yandi diaka mavimpi ya yandi. Pesa yawu, Tata. Samu ti Nge pesaka nsilulu ya bima yayi, mpe beto ke kwikila yawu. Mpe kaka mutindu beto vwandaka banza na suka yayi, ti kitamina kele kima ya mpamba samu na Nge, Nge ke ya kulutula nene na kisika yayi ya yinza mpe Nge ke mutindu mosi na kisika yina yankaka, samu ti Nge ke yina ke bisika nionso, yina ke na ngolo nionso, mpe yina ke na nsuka ve. Mpe beto ke sambila, Tata, ti Nge pesa mvutu na bandombolo yayi na Nkumbu ya Yesu Klisto. Amen.

<sup>5</sup> Mu ke na kiese mingi na kuvwanda mbala mosi diaka awa na nkokila yayi, ku . . . Mpe mu zaba ti mwini kele ngolo. Yayi kele balukutakanu tatu yina me landana, mpe ya kele . . . Mu zaba ti bayankaka kati ya beno ke kwenda na ba mile nkama tanu [800 kilometres] na ditoma na kubanda ntangu yayi tii mbasi na suka. Mpe na manima ya mbasi, mu ke kwenda na ditoma na bitamina funda mosi na nkama yiya [2250 kilometres] na manima ya yayi. Na yina, na yina mu—mu banza ti ya me vwanda ntangu mosi ya mbote samu na beno nionso. Mpe ya me vwanda ntangu mosi ya mbote samu na munu na kuvwanda na beno. Beto me lombaka kima mosi, yina me sala ti bantu mingi kuvutuka samu ti kisika kele ya fioti, beto lenda ve kufulusa bantu na couloir, misadi yina ke fwaka tiya ke bika beto mpamba ve samu na yawu. Na yina ntangu yayi beto ke sala nionso na kukumisa yinzo-Nzambi mwa nene diaka, samu ti ntangu beto kele awa, beto lenda kuzwa bisika ya kuvwandisa bantu.

<sup>6</sup> Mpe ntangu yayi, na konso ntangu yina, beno lenda vwanda na kwizulu ya mbote awa na tabernacle, awa beto kele ve na credo mosi ve kasi Klisto, musiku yankaka ve kasi zola, buku yankaka ve kasi Biblia. Mpe na yina . . . Mpe pasteur ya beto kele Mpangi Orman Neville awa. Mpe dibuundu ya beto awa kele kimvuka ya—ya bantu mingi yina ke vukana mutindu tabernacle yina ke yambaka bantu nionso, kisika beno lenda kwisa kembila Nzambi na kulanda luzolo ya beno mosi. Beto kele konso ntangu na kiese na kuvwanda na beno. Mpe na yina beno lenda kwisa ntangu nionso beno zola, beto ke na kiese ntangu nionso na kuyamba beno.

<sup>7</sup> Mpe na yawu na ntangu ke kwisa, yina mu banza, kuvwanda na beno, ya ke vwanda na nsuka ya yinzo-Nzambi. Mpe kuna mu zola ti, na manima ya *Bansungi ya Dibundu*, kuna beto zola banda *Binieminu* sambwadi ya nsuka, mpe ya sambwadi ya nsuka ya *Binieminu* na Buku ya Luzabusu, kulongisa Yawu.

<sup>8</sup> Mpe awa bambala mingi bantu ya kubela mpe ya mpasi ke kwisaka, mpe na balukutakanu yango, ya ke lombaka ba vision, mpe bantu ke kwisaka na masolo ya kinsweki. Kana mu kota na kati ya yina, kuna mu—mu lenda ve kusala luswaswanu na bawu nionso, mpe, ve, ya kele mpasi samu na munu na kulonga na manima ya yina. Mpe bantu nionso zaba ti na bacampagne ya beto ya kubeluka ya nzutu, ti Tata Baxter to muntu yankaka ke longaka, mpe munu ke basikaka samu na kusambila bambevo, samu ti ya ke lembisaka mingi. Na mwa ntangu fioti me luta mu vwanda sambila samu na bantu, mpe kuna mu kutanaka mwana mosi awa yina badokotolo . . . butukaka, na kima mosi na manima. Na kubasika, mu me mona yandi kuna na plâtre. Mwana yina lungaka ve kuvwanda kikata mutindu yina, ya ke beluka. Ya kieleka, ya ke mutindu yina, beno me mona. Yina, mu zaba yawu. Beno me mona, mu ke kwikila yawu. Na yina beto zola vwanda na lukwikilu mpe kukwikila na Nzambi.

<sup>9</sup> Mosi na mosi ya beno, mpe mingi kati ya beno kele banzenza samu na munu, misadi nionso mpe bayankaka. Kana mu me zimbanda ve, yayi ke Mpangi Crase. Mutindu yina ve? Mpangi Crase, mu—mu fwana lomba lemvo ya nge, na yina mu vwandaka ve na mbiekolo. Keba ve na lukutakanu ya mansukina ya sabala mu lendaka vwanda, yina ke vwanda mbote. Mutindu yina ve? Kuna na Bloomington. Beno kele mbote kuna? Mbote. Ndambu ya bampangi ya babakala awa kele balongi, mu banza. Nge kele longi? Yinga, tata. Mfumu kusakumuna nge. Mpe balongi yikwa kele awa na kati ya yinzo yayi, beno telemisa maboko ya beno. Mbote, nionso yina ke mbote mingi. Beto kele na kiese na kuvwanda na beno awa, kiese mingi. Nzambi kusakumuna beno konso ntangu!

<sup>10</sup> Ntangu yayi, samu beto lunga basika na ntangu ya mbote, samu ti ndambu ya bawu ke kwenda na Georgie, na Tennessee, na New York, bisika nionso, katuka na nkokila yayi, kubanda na nkokila yayi. Ntangu yayi, beno nata ditoma na nkebolo nionso na nzila. Kana beno kele na pongi, mpe zola ve kulala na yinzo ya nzenza, beno nata ditoma na lweka ya nzila mpe beno lala tii beno . . . Ya ke mutindu yina mu ke salaka. Beno me mona, beno kwenda kaka na lweka mpe kulala. Beno nata ve, beno nata ve ditoma kana beno ke na pongi. Ya ke kima ya yimbi. Mpe, beno bambuka moyo, ya kele beno ve, kasi beno fwana mona muntu yina kele na ntwala ya beno. Beno me mona? Beno zaba kisika yina beno ke na kukwenda, kasi beno zaba ve kisika yina yandi ke na kukwenda, na yawu—na yawu beno keba na muntu yina. Kuna, beno vwanda na nkebolo konso ntangu, na kukebaka yawu.

<sup>11</sup> Ntangu yayi, mu ke zola tanga na nkokila yayi kisika mosi na Masonuku yina kele na Buku ya Santu Jean. Mpe na ntangu yayi, mwa Masonuku yayi yina beto ke tanga kaka mpe yina beto ke landila, kele dibanza ya yina beto ke meka kutuba. Mpe ntangu

nionso, munu ata mbala mosi ve, na yina mu zaba, kwisaka na chaire, na kumeka kaka na kutuba mwa kima ya kutuba. Ntangu nionso mu ke mekaka na kuingila, kusala keba, kulonguka, kusambila, tii na ntangu yina mu ke kuzwa kima yina lenda sadisa bantu. Kana mu lenda vwanda ve lusadusu, na yina ya ke na mfunu ve samu munu kwisa telema awa, beno me mona. Ya kele, kumeka kusadisa! Mpe awa na nkokila yayi, ya kieleka, mingi ya bantu ya beto me kwenda na suka yayi, mpe bawu fwana kwenda na yinzo, mingi kati ya bawu. Kasi, na nkokila yayi, mu tubaka na beno ti kana beno ke bikana beto ke meka kuzonza kaka na baminuti makumi yiya na tanu na kima yina mu banza yina lenda sadisa beto. Mpe awa beto ke sikimisa yayi na Santu Jean, kapu ya 16, mpe beto banda keba ve na kitini ya 7 ya kapu 16, mpe kutanga tii na kitini ya 15.

*Ya kieleka mu ke na kutubila beno; Ya ke mbote mingi na beno ti Mu kwenda: samu ti kana Mu kwenda ve, Kisadisi ke kwisa na beno ve; kasi kana Mu kwenda, Mu ke fidisa beno yandi.*

*Mpe ntangu yandi ke kwisa, yandi ke talisa bantu ya yinza ti bawu vunamaka na yina me tadila masumu, mambu ya kusungama, mpe ya lusambusu:*

*Ya masumu, samu ti bawu kwikilaka na munu ve;*

*Ya mambu ya kusungama, samu ti mu ke kwenda na sika ya Tata ya munu, mpe beno ke mona munu diaka ve;*

*Ya lusambusu, samu ti yandi me sambisa mfumu ya yinza yayi.*

*Mu ke diaka na mambu mingi ya kuzabisa beno, kasi ntangu yayi beno lenda ve kukanga ntima na kuwa yawu.*

*Ntangu yandi, Mpeve ya kieleka, ke kwisa, yandi ke twadisa beno na kieleka nionso: samu yandi ke zonza ve na lutumu ya yandi mosi; kasi yandi ke zonzila beno, mambu nionso yina yandi ke wa: mpe yandi ke lakisa beno mpe mambu yina ke kwisa.*

*Samu ti, yandi ke kembisa munu: samu ti yandi ke lakisa beno, mambu yina yandi ke kuwa na munu.*

*Bima nionso ya Tata kele na yawu—kele ya munu: ya ke samu na yina, Mu me zabisa beno ti, yandi ke lakisa beno mambu yina yandi ke kuwa na sika ya munu.*

<sup>12</sup> Ntangu yayi na nzila yayi ya 13. “Kasi ntangu Mpeve ya Kieleka ke kwisa, Yandi ke twadisa beno na Kieleka nionso. Ntangu Mpeve ya Kieleka ke kwisa, Yandi ke twadisa beno na Kieleka nionso.” Yinki kele Kieleka? Ndinga. “Samu Yandi ke zonza, Yandi ke zonza ve samu na Yandi mosi; kasi yina Yandi ke kuwa, Yandi ke zonza. Yina Yandi ke kuwa, Yandi ke zonza.”

Na nzonzolo yankaka, Yandi ke vwanda Yina ke monisa pwelele kima mosi, beno me mona. Mpe na kapu 4 ya ba Hebreux, Biblia me tuba ti “Ndinga ya Nzambi kele ya kulutila meno, kulutila meno mutindu mbele yina kele na meno balweka nionso zole, Yawu ke swasikisaka mabanza, ya ntima.” Beno me mona, “Yina Yandi ke kuwa, yawu yina Yandi ke zonza, mpe Yandi ke zabisa beno bima yina ke kwisa.” Beno me mona? Nani ke sala yawu? Mpeve-Santu Yina ke kwisa na Nkumbu ya Mfumu Yesu.

<sup>13</sup> Mpe mu zola baka bamuniti yina ke landila samu na kubenda nkebolo ya beno na zulu ya mpova yayi “ntwadisi,” *Ntwadisi*. Beno zaba, mu me kuzwaka nzingilu na bamfinda. Ntwadisi, muntu yina ke lakisa beno nzila. Beno fwana vwanda na ntwadisi kana beno zaba ve kisika yina beno ke kwenda. Mpe na yina mu me mesanaka na kuzomba, mpe na bisika nionso na yinza, mu kuzwaka ntangu ya mbote ya kukutana na bantwadisi. Munu mosi mpe, mu ke ntwadisi, na Colorado, samu mu zaba yinsi, mu vwandaka sala na ranch, mpe nionso yina, mu lenda kutwadisa na Colorado.

<sup>14</sup> Ntangu yayi, ntwadisi fwana zaba nzila. Yandi fwana zaba kisika yina yandi ke kwenda mpe yina yandi ke salaka, mpe wapi mutindu kukeba beno na nzila. Beno me mona? Yandi fwana keba ti beno zimbana ve. Ntwadisi kele muntu yina ba soolaka. Luyalu ke soola muntu yayi kana yandi kele ntwadisi. Mpe, ntangu yayi, ntangu beno ke kwenda na kulenga na bisika ya mfinda, kisika yina beno zaba ve, ya ke mbote ve na beno na kukwenda kukondwa kuvwanda na mosi. Ya kieleka, ya kele na bisika beno lenda kukwenda ve kukondwa mosi, mutindu, na Canada. Ntwadisi fwana pesa beno muswa samu na mukengi ya mfinda. Yandi mosi fwana tula kinieminu ya yandi, yandi ke pesa mvutu samu na beno. Kana kima kumina beno, ya ke vwanda na zulu ya yandi. Yandi fwana kukeba beno. Yandi fwana sala ti beno kuzimbana ve. Yandi fwana keba na kutinda beno na kisika yina beno lenda ve kuzaba nzila ya beno ya kuvutuka. Mpe kana beno zimbana, yandi fwana zaba yinsi mbote-mbote ti ntangu nionso yandi lendaka kwisa baka beno. Yandi fwana kuzaba bima nionso yayi to yandi lenda ve kuvwanda ntwadisi, yandi lenda ve kuzwa muswa ya kuvwanda ntwadisi.

<sup>15</sup> Samu na bima ya mutindu yayi, bantangu yankaka beno fwana kubaka dilaká, kubokila ntete na mantwala mpe kukubika nionso, samu beno kubama na kunata beno. Mpe kana . . . Bantangu yankaka yandi ke na manaka ya kufuluka mpe lenda nata beno ve, na yawu beno fwana vutula yawu na ntangu yankaka, samu—samu na ntwadisi ya ntoto. Ata mbala mosi ve beno fwana sala mutindu yina na Ntwadisi ya Nzambi, Yandi kele ya kukubama konso ntangu, konso ntangu ya kukubama.

<sup>16</sup> Ntangu yayi, kana beno me kubama ve, mpe beno zola kwenda tambula na kisika ya mfinda kisika yina beno me

kwendaka ntete ve, beno lendaka zimbanana, mpe kufwa. Beno ke na siansi mosi na zulu ya nkama na kubasika na kisika ya mfinda yina, mutindu yina, kana yawu ke nene mingi ve, kuna beno lenda vwanda na siansi mosi na zulu ya nkama samu beno basika beno mosi. Kasi kana yawu kele mfinda mosi ya yimbi mingi, na kuvutuka, beno ke na siansi ve na kubasika. Ya kele ve na mutindu yankaka ya kusala yawu, samu ti beno me kuma na nzila ya lufwa, mpe kuna beno—beno ke suka, na yawu yimeni samu na beno. Ntangu yayi, mpe beno ke kufwa kana beno kele ve na ntwadisi yina zaba yinsi mpe yina zaba wapi mutindu ya kuvutuka.

<sup>17</sup> Mingi kati ya beno tangaka mukanda yina na mvula me luta kuna na Tucson, Arizona, ya ba Boy Scout yina. Na kutala, ba longukaka samu na kuzaba wapi mutindu ya kukikengila bawu mosi, ba vwandaka ba-scout. Mpe ba vwandaka kaka ve ba Cub Scout, ba vwandaka ba-scout ya kulunga. Mpe ba kwendaka tambula kuna na bamongo, mpe kitembo ya mvula ya mpembe kubwaka, zulu kumaka mutindu yankaka. Mpe na ntangu ba bakulaka ti ba me zimbanana mpe kuna bawu nionso kufwaka, samu ti bawu...kima mosi, ya mutindu yankaka yina salamaka ntete ve salamaka, ba zabaka ve mutindu ya kubasika. Beno me mona? Mpe mu me zimbanana bana yikwa ya babakala yina kufwaka kuna na mongo, ata ti ba tindaka ba-hélicoptère, mpe Kimvuka ya basoda na bantu, mpe Mikengi ya Yinsi, mpe lusalusu ya bantu yankaka, mpe bima nionso. Kasi ba zimbanana, muntu ve zabaka kisika ba vwandaka. Mpe ba lendaka ve kukikengila bawu mosi. Bawu nionso kufwaka na mvula ya mpembe samu ti ba zabaka ve kana ba vwandaka kwenda na este, nord, weste to sud, kumata to kukulumuka, to wapi mutindu ya vwandaka, nionso vwandaka monana mutindu mosi.

<sup>18</sup> Ntangu yayi, ntwadisi zaba kisika yina yandi kele, ata wapi mutindu ntangu lendaka vwanda. Yandi kele—yandi kele na luzabu ya kusala yawu. Yandi zaba yinki yandi ke na kusala. Yandi me mesanaka na nionso. Yandi zaba wapi mutindu bima nionso kele, kana yandi lenda vwanda na kati ya mpimpa mpe yandi lendaka simba mwa kima mosi.

<sup>19</sup> Mumbandu, beno tala awa kinsweki ya nkulu ya ntwadisi. Beno zaba, kana beno lenda tala bambwetete, muntu nionso lenda zaba kisika yina beno ke kwenda kana beno tala bambwetete. Mpe beno fwana konso ntangu kutala na mbwetete ya kieleka mosi kaka. Ya kele kaka na mbwetete mosi ya kieleka, mpe yina kele Mbwetete ya Nord. Beno me mona, kaka mosi, yawu ke vwandaka kaka na kisika mosi. Yina ke monikisaka Klisto, mutindu mosi mazono, bubu yayi, mpe kukonda nsuka. Bayankaka lenda bika nzila, kasi Yandi kele mutindu mosi. Mabuundu lenda nata beno na lweka *yayi*, to

bayankaka kunata beno lweka *yina*; kasi Yandi ve, Yandi ke konso ntangu mutindu mosi.

<sup>20</sup> Mbote, ntangu yayi, kana beno lenda mona ve Mbwetete yayi ya Nord, mpe matuti kele mingi, kuna kana beno tala, kana mwini me basika mpe beno me zimbanana, beno tala bayinti. Yinti kele konso ntangu, ke vwandaka na mafulu na lweka ya nord ya yinti, samu ti lweka ya sud ya yinti ke kuzwaka mwini kulutila na lweka ya nord. Kasi wapi mutidu kana mpimpa kele mpe beno lenda mona ve mafulu? Kana beno kanga meso ya beno mpe kukondwa kumeka kubanza diambu mosi ve, beno kanga meso mpe beno sosa yinti yina ke na mpusu ya pete-pete, beno balusa maboko ya beno na yinti mutindu yayi tii misapi ya beno ke kutana, mpe kuna beno banda kubaluka yinti ya ngo na malembe nionso. Mpe ntangu beno ke kuma na kisika yina mpusu ya nene mingi, ya kupasuka, yina kele lweka ya nord (mipepe), mpe kuna beno lenda zaba wapi kisika beno ke kwenda, nord to sud. Mpe na mutindu yina, oh, bima kele mingi, kasi ya lunga vwanda na bantwadisi samu na kuzaba wapi mutindu ya kusadila bima yayi. Muntu ya mpamba lenda telema kuna mpe kutuba, “Mu ke mona ata luswasanu na yawu ve.” Beno me mona? Beno me mona, beno fwana longuka kisalu ya ntwadisi yina.

<sup>21</sup> Mpe bana yayi ya babakala, na ntembe ve ti ba vwandaka bascout ya mbote, mbala yankaka ba zabaka kukanga dizita, mbala yankaka ba zabaka kupelisa tiya na matadi, mpe nionso yankaka yina. Kasi kuzaba nzila ya kuvutuka, yina vwandaka diambu ya nene! Bawu, bawu zabaka ve nzila ya bawu ya kuvutuka, mpe kuna bawu nionso kufwaka samu ti bawu kwendaka ve na ntwadisi.

<sup>22</sup> Tata mosi ya kukondwa nkebolo, na bamvula zole me luta, na Colorado, oh, yandi vwandaka kwenda na bamongo, yandi vwandaka na mwana-bakala mosi ya bamvula sambanu, bamvula sambwadi. Yandi zolaka nata yandi kuzomba nkabi na mbala ya ntete. Bawu kwendaka kuna na zulu ya mongo, mpe mwana tubaka na tata ya yandi, “Mu me lembe.”

<sup>23</sup> “Mata na mukongo ya munu. Beto me kuma ntete ve na zulu mingi, bankabi ke kuna na zulu.” Bakala yina kwendaka mpe kwendaka mpe kwendaka tii ntangu yandi. . . Yandi zabaka ve, yandi vwandaka muntu ya mbanza. Yandi zabaka ve kima mosi na yina me tadila kuzomba to kisika ya kukwenda. Konso muntu yina zaba kima mosi na yina me tadila bamfinda zaba ti bankabi ke vwandaka ve kuna na zulu. Bawu ke kwendaka ve kuna na zulu. Bankombo kele yina ke vwandaka kuna, nkabi ve. Ba ke vwandaka kuna na nsi kisika ba lenda kudia, ba fwana kuzwa kisika yina kele na kima ya kudia. Mpe, na yawu, kasi muntu yayi banzaka, “Kana mu kuma kuna na zulu ya matadi ya nene kisika mosi kuna na zulu, mu ke kuzwa bakala mosi ya nene.” Yandi monaka foto ya bayina vwandaka na zulu—vwandaka na zulu ya ditadi ya nene, mpe yandi banzaka ti ya kele na kisika

yina yandi ke kuzwa yandi. Beno landa ve yina ba ke zonzaka na bamagazine, la la, oh, la la, beno ke lota ndosi mosi ya boma! Yina, ya kele kaka na kima mosi ya kusala, ya kele kuvwanda na ntwadisi mosi samu na kuzaba kisika yina beno kele.

<sup>24</sup> Mpe tata yina, mbala mosi kuna na zulu mvula bandaka na kunoka, mosi ya bamvula yina ke nokaka na nswalu nionso. Mpe muntu yina vwandaka zomba na manima ya ntangu, tii ntangu mpimpa kubwaka mpe yandi vwandaka zaba diaka ve nzila ya yandi ya kuvutuka. Mpe. . .kuna mipepe kwisaka na zulu ya bamongo, mpe yandi vwandaka kwenda na nswalu nionso, mpe yina kele. . .

<sup>25</sup> Beno fwana zaba wapi mutindu ya kuvwanda na moyo, kana beno me kangama. Ya kele kima yankaka, kuzaba wapi mutindu ya kuvwanda moyo! Mu mataka na bayinti mpe kusyelumuka na bawu, mpe mataka na bayinti mpe mu syelumukaka, mataka mpe kulumukaka mutindu yina, samu na kuvwanda ya moyo. Mu tambulaka na mvula-mpembe ntangu ya lendaka vwanda na kitezo ya bitambi yiya [1,22 metres] na bisika nionso, kupasula bitini mpe kubika yawu na nsi. Mpe nsatu lutilaka mingi ti mu vwandaka kuka ve! Mu pasulaka bitini yina ya ntama, mpe kutula yawu tiya mpe kubika yawu kuzwa tiya mpe mwini vwandaka sulumuna mvula-mpembe. Mpe kuna mbala yankaka na ngunga mosi na suka, na ngunga ya zole, mu vwandaka tula na lweka bansimbulu, mpe mu lalaka na ntoto ya tiya, samu na kuvwanda ya moyo. Mpe beno fwana kuzaba wapi mutindu kusala bima yayi.

<sup>26</sup> Mpe muntu yayi zabaka ve yinki yandi vwandaka sala, yandi vwandaka na muntu ve samu na kutwadisa yandi. Mpe yandi tulaka mwana ya yandi ya bakala na ntulu ya yandi tii kuna yandi kumaka madidi mpe yandi fwaka. Samu na kukondwa nkebolo! Kana yandi kwendaka na ntwadisi, yandi zolaka basisa yandi kuna na nswalu nionso na mongo na konso ntangu yina ya lendaka vwanda, beno me mona. Kasi yandi vingilaka tii ya kumaka mpimpa, kuna yandi lendaka mona ve nzila ya yandi.

<sup>27</sup> Yina kele diambu na kati ya Baklisto bubu yayi. Bawu ke vingilaka tii mpimpa ke baka kisika, kuna beno ke bakula ti beno kwendaka kukondwa Ntwadisi. Ntwadisi!

<sup>28</sup> Mbote, beno me monaka ntete muntu yina me zimbana? Ya ke na muntu me kuzwaka ntete kimbangi ya kunata muntu yina zimbanaka? Ya ke kima ya kulutila kyadi yina beno me monaka ntete ve. Ntangu muntu ke zimbanaka, yandi ke kumaka mutindu kilawu. Yandi zaba ve yinki yandi ke sala. Beto kuzwaka muntu mosi kuna, mpangi-bakala, yandi zimbanaka na mfinda, mpe yandi vwandaka banza. . . Yandi vwanda salaka na ranch, kasi yandi vwandaka ve na kizunga ya yandi mpe yandi zimbanaka, yandi vwandaka baluka kaka kisika mosi. Mpe ntangu bawu kuzwaka yandi na manima ya bilumbu tatu, yandi



vwandaka tambula nswalu mutindu kilawu, na kubokaka ngolo. Bikoba ya yandi nionso vwandaka ya kupasuka, mpe yandi losaka munduki ya yandi mpe yandi zabaka ve yinki kusala. Mpe ntangu mpangi ya yandi mosi, ntangu . . . Ba fwana simba yandi mpe kukanga yandi. Ntangu mpangi ya yandi mosi kwisaka na yandi, yandi dumukaka na zulu ya yandi mutindu niama mosi, na kumekaka kutatika yandi, yandi zabaka ve kisika yina yandi vwandaka. Samu na yinki? Yandi vwandaka ya kuzimbana. Mpe ntangu muntu ke zimbanaka, yandi ke vwandaka na kati ya kitezo mosi ya bulawu. Mpe yandi zaba ve ti yandi kele mutindu yina, samu ti na kuvwandaka ya kuzimbana yina ke pesa yandi tiya na nzutu, mpe yandi zaba ve kisika yina yandi kele mpe yinki yandi kele na kusalaka.

<sup>29</sup> Na yina ya ke mutindu yina ntangu muntu kele ya kuzimbana na Nzambi! Yandi ke sala bima yina yandi lendaka kusala ve. Yandi ke sala bima yina—yina kele na nganda ya mabanza ya yina muntu lendaka sala ve. Muntu yina me zimbana na Nzambi, dibuundu ya kuzimbana na Nzambi, dibuundu yina me kwenda ntama na Nzambi, yina me kwenda ntama na misiku ya Biblia ya Nzambi, ke sala bima yina bantangu yankaka yina beno lenda ve kuzwa na kati ya dibuundu ya Nzambi ya moyo. Ba ke kuzwa mbongo na nzila ya bansaka ya bingo, ke bula loterie, ke bula nsaka ya mbongo, nionso yina ba lenda sala. Ba ke longa konso kima, kubika konso kima kuluta, ba ke bondila muntu yina ke pesaka mbongo mingi na dibuundu, mpe nionso ya mutindu yina, kubika bawu kukwenda mutindu yina. Yina ke kieleka. Kimvuka ya ba-diacre ke ndima bayina me kwelanaka bambala yiya to tanu, samu kaka na kulungisa yawu, na kulungisa mbongo ya nsuka ya ngonda. Ya ke kaka na nsuka mosi yina beno fwana lungisa, yina kele, yina beno fwana sala na Nzambi. Kutelema mpe kutuba Kieleka! Ya kuzimbana, muntu yina me zimbana kele na kitezo mosi ya bulawu, yandi kele kilawu.

<sup>30</sup> Ntwadisi kele na luzabu, yandi zaba wapi mutindu ya kukwenda mpe yinki kusala. Nzambi na . . . Nzambi ke fidisaka konso ntangu ntwadisi na bantu ya Yandi. Ata mbala mosi ve Nzambi me lembanaka kusala yawu. Yandi ke tindaka ntwadisi, kasi beno fwana kundima ntwadisi yango. Beno me mona? Beno fwana kwikila yawu. Beno fwana kwenda na lweka yina yandi ke tuba. Kana beno kwenda na kisika ya mfinda, mpe ntwadisi ya beno tuba “beto kwenda lweka *yayi*,” mpe kasi beno banza ti na kukwendaka na lweka *yina*, beno ke zimbana. Na yina ntangu beno . . . Nzambi me tinda beto ntwadisi samu na kutwadisa beto, beto fwana landa ntwadisi yina. Ata nionso yina beto lenda banza, ata ti ya lendaka monana mbote mpe ata ti ya lendaka monana buzoba, beto kele ve bayina lenda sambisa yawu, yina me tala ntwadisi yandi mosi.

<sup>31</sup> Nzambi, na Ngwisani ya Ntama, tindaka baprofete. Ba vwandaka bantwadisi, samu ti Ndinga ya Mfumu ke kwisaka

na profete. Ba vwandaka bantwadisi. Bawu vwandaka pesa bantu ndongosolo mutindu beto vwandaka zonzila mazono na mpimpa, na Esaïe mpe Ozias. Bawu zwaka ndongosolo, mpe ba pesaka bantu ndongosolo mpe twadisaka bawu. Mpe ntangu yayi na konso ntangu Nzambi ke tindaka bantwadisi ya Yandi, ata mbala mosi ve na konso ntangu Yandi me kondwaka ntwadisi, na kati ya bansungi nionso. Konso ntangu Nzambi vwandaka na muntu yina monikisaka Yandi na ntoto yayi, na kati ya bansungi nionso.

<sup>32</sup> Ntangu yayi, na bantangu yankaka bantu ke kwendaka ntama ya ntwadisi, “ba me basika na nzila,” mutindu beto ke bokilaka yawu. Ntangu Yesu vwandaka awa na ntoto, beno me zimbana yina Yesu tubaka na ba-Pharisien, “Beno bantwadisi ya mpofo”? Bantwadisi ya mpofo, ya mpofo na bima ya kimpeve. Beno me mona? Ntangu yayi, ba zolaka vwanda bantwadisi, bantwadisi samu na bantu, samu na kutwadisa bantu na mpulusu. Kasi Yesu tubaka, “Beno kele bampofu!” Mpe Yandi tubaka, “Beno bika bawu, samu ti kana mpofo ke twadisa mpofo, bawu nionso zole ke kubwa ve na dibulu?” Bantwadisi ya mpofo! Oh, tala mutindu yinza me beba na yina, balutwadusu ya bampofu. Yandi zola ve ti beno landa luzabu ya beno mosi. Nzambi zola ve ti beno landa luzabu ya beno to mabanza ya beno, to mabanza ya kimuntu.

<sup>33</sup> Nzambi me tinda Ntwadisi, mpe Nzambi zola beno bambuka moyo ti yina kele Ntwadisi yina Yandi soolaka. Mpe beto fwana bambuka moyo na Yandi. Awa Yandi me tuba, Yesu tubaka, “Mu ke bika beno mpamba ve, kasi mu ke lombata Tata mpe Yandi ke tinda beno Kisadisi yankaka.” Mpe Kisadisi yayi, ntangu Yandi ke kwisa, ya ke twadisa beto na Kieleka nionso. Mpe Ndinga ya Nzambi kele Kieleka, mpe Ndinga kele Klisto, “Mu kele Nzila, Kieleka, mpe Luzingu.” Yandi kele Ndinga, “Na mbandukulu vwandaka Ndinga, mpe Ndinga vwandaka na Nzambi, Ndinga vwandaka Nzambi. Mpe Ndinga kumaka muntu mpe zingaka na kati ya beto.” Kuna kana beto landa Ntwadisi ya kulunga ya kieleka, Mpeve-Santu, Yandi zolaka kutubila beto yina Yandi monaka, yina Yandi kuwaka, mpe Yandi zolaka talisa beto bima yina ke kwisa. Amen. Beno me mona. Yandi ke lakisa beno bima ke kwisa.

<sup>34</sup> Mpe na ntangu mabuundu ke manga Yawu bubu yayi, wapi mutindu beto lendaka kwenda na Zulu? Ntangu ba tindaka beto Mpeve-Santu mutindu Ntwadisi, beto ke ndima cardinal mosi, évêque mosi, mukengi mosi ya nene, to muntu mosi ya mutindu yina samu na kutwadisa beto, ntangu Mpeve-Santu pesamaka na beto samu na kutwadisa beto.

<sup>35</sup> Mpe Mpeve-Santu ntangu nionso ke zonzaka Ndinga. “Mu ke na mambu mingi ya kutubila beno, beno lenda bakisa Yawu ve na ntangu yayi, kasi ntangu Yandi ke kwisa, Yandi ke twadisa beno na Yawu.” Tala samu na yinki Bidimbu kwisaka. Na nsuka

ya Kidimbu ya Sambwadi, mansweki ya Nzambi ke lungisama, kuzaba Nani keke Nzambi, nani Yandi keke, mutindu Yandi ke zingaka, nkadulu ya Yandi, Bunzambi ya Yandi. Beno fwana vwanda kuna na zulu *awa* na ntangu yina, beno me mona, kunata beto na kitezo ya kifuluka ya bana-babakala mpe ya bana-bakento ya Nzambi, Dibuundu yina me sumbama na Menga ya Klisto, yina me sumbamaka na mbongo ve, yina sumbamaka na Menga ya Yesu Klisto.

<sup>36</sup> Ntangu yayi, beto yayi awa, Ntwadisi, mpe Yandi keke Ntwadisi yina Nzambi me kubika. Ntangu yayi, beto ke na kuzengisa mfinda, mpe beto ke na nzila na kisika mosi kuna, mpe beto lendaka kwenda ve kukondwa Ntwadisi yayi. Mpe mu me kebisa muntu nionso yina ke meka kuyingisa ntwadisi na kima yankaka! Kana beno sala yawu, yandi ke basisa beno na nzila. Ntwadisi yayi zaba nzila! Yandi zaba konso kitini ya nzila. Yandi zaba konso dibanza yina keke na ntima ya beno. Yandi zaba muntu nionso yina keke awa. Yandi zaba nani beno keke mpe yinki beno me sala, mpe nionso yina me tadila beno. Yandi ke Ntwadisi ya Nzambi, Mpeve-Santu, mpe ke zabisa beno bima, mpe ke tubila beno bima yina Yandi waka, kuvutukila mbote bampova yina beno zonzaka mpe kutuba yina beno tubaka. Amen. Kuzabisa yina beno vwandaka, yina keke na beno, kisika yina beno ke kwenda. Ntwadisi, Ntwadisi ya kulunga, mpe Yandi ke twadisa beno na Kieleka nionso, mpe Ndinga ya Yandi keke Kieleka.

<sup>37</sup> Ntangu yayi, ata fioti ve Mpeve-Santu lendaka sala ti beno kutuba, “amen,” na credo yina me salama na muntu. Ya ke tubaka “amen” kaka na Ndinga ya Nzambi, samu ti Ya keke kieleka. Mpeve-Santu lendaka twadisa beno ve na nzila yankaka. Awa kima ya ngitukulu keke, beto nionso, ba denomination ya beto nionso ya nene mpe nionso, beto nionso ke zonzaka ti beto keke na lutwadusu ya Mpeve-Santu, mpe ya keke na luswaswanu mingi na kati ya beto mutindu kilumbu na mpimpa.

<sup>38</sup> Kasi ntangu Paul, mwa Pharisien yina kuzwaka Mpeve-Santu ntangu Ananias botikaka yandi, yandi kwendaka na Arabie mpe longukaka bamvula tatu, yandi vutukaka, mpe na kati ya bamvula kumi na yiya yandi kwendaka ata mbala mosi ve kuyufula dibuundu na yina me tadila diambu mosi, mpe ntangu yandi kwisaka mpe kutanaka na Pierre, kuluntu ya dibuundu ya Jérusalem, ba vwandaka na Malongi mosi. Samu na yinki? Mpeve-Santu mosi kaka! Kisika Pierre vwandaka botika na Nkumbu ya Yesu Klisto, Paul vwandaka sala mpe mutindu mosi ata muntu tubilaka yandi ve. Kisika Pierre vwandaka longisa kubotika ya Mpeve-Santu, mpe kusantisama, mpe nionso yina, Paul vwandaka sala mutindu mosi, kukondwa kuyufula dibuundu, samu ti Ya vwandaka na Ntwadisi mosi kaka. Kuna wapi mutindu ya lendaka vwanda bubu yayi ntangu bantu ke

na kumanga Bakieleka yayi? Ntangu Pierre longisaka mutindu dibuundu fwana vwanda ya kusungama, Paul vwandaka mpe na Malongi mosi, samu ti ba vwandaka na Ntwadisi kaka mosi.

<sup>39</sup> Ntwadisi lendaka ve kunata mosi na lweka *yayi*, mpe mosi na lweka *yina*, mpe kutinda mosi na este mpe yankaka na weste. Beno me mona, Yandi ke bumba beno kintwadi. Mpe kana beto lendaka bika Mpeve-Santu kubumba beto kintwadi, beto ke kuma mosi. Kana—kana beto lendaka kaka kundima ve diabulu kunata beto na nzila ya yimbi, beto ke vwanda ntima mosi, dibanza mosi, beto ke wisana, na Mpeve mosi, Mpeve-Santu, Ntwadisi ya Nzambi yina ke twadisa beto na Kieleka nionso. Yina ke kieleka. Kasi beno fwana landa Ntwadisi ya beno. Yinga, tata.

<sup>40</sup> Beno tala Nicodème, yandi vwandaka na nsatu ya Ntwadisi, na kutala yandi vwandaka muntu ya mayele. Yandi vwandaka longi, mbala yankaka ya bamvula makumi nana. Yandi vwandaka mosi ya Ba-pharisien, to—to ya Bayinzo ya Lufundusu ya Kimvuka ya Bakuluntu, ya Kimvuka, ya Kimvuka ya Balongi. Yandi vwandaka mosi ya bantu ya bawu ya nene, longi na Israël, mulongi na yina me tadila yawu. Beno banza na yawu, mulongi ya balongi! Yinga, yandi zabaka misiku, kasi na ntangu ya lubutuku ya mbala zole, yandi vwandaka na nsatu ya Ntwadisi. Yandi vwandaka na nsatu ya yawu. Yandi zabaka ti kuna vwandaka na kima ya luswaswanu. Kusolola ya yandi na Klisto na mpimpa yina lakisaka yawu. Yina lakisaka mpe yayi, bayankaka vwandaka na dibanza yina, kasi ata mosi ve ya bawu kuzwaka ya kieleka—ya kieleka kikesa yina yandi kuzwaka. Ata mosi ve ya bawu lendaka kwenda kuna mpe kusala yina yandi salaka. Beno nionso, bantu, ke bedisaka Nicodème samu yandi kwendaka na mpimpa yina. Yandi kwendaka kuna. Yandi kumaka. Mu zaba bantu yina lendaka ve kubanda, na ntangu to na mpimpa. Kasi yandi kwendaka kuna, mpe yandi vwandaka na nsatu ya Ntwadisi, mpe yandi tubaka, “Mulongi, beto,” ya Yinzo ya Lufundusu ya Kimvuka ya Bakuluntu, “beto zaba ti Nge kele Longi yina me katuka na Nzambi.” Wapi mutindu yandi zabaka yawu? Yandi siamisamaka. Beno me mona, yandi zolaka zaba yinki zola kutuba kubutuka ya mbala zole yayi, mpe yandi kwendaka na Yina vwandaka ya kulunga, samu ti Nzambi siamisaka ti Yayi vwandaka Ntwadisi ya Yandi, Yesu. Beno tala yina yandi tubaka, “Mulongi, beto zaba ti Nge kele Longi yina me katuka na Nzambi, samu ti muntu mosi ve lendaka sala bima yayi Nge ke sala, kana Nzambi kele na yandi ve.”

<sup>41</sup> Kimbangi mosi vwandaka kuna, ti ya vwandaka na Nzambi ya moyo na kati ya Yandi. Yandi pesaka kimbangi, “Munu ve ke salaka bisalu; ya ke Tata ya Munu yina ke na kati ya Munu. Ya kieleka Mu ke tubila beno, Mwana lenda sala kima mosi ve na Yandi mosi; kasi kaka yina Yandi ke monaka na Tata, Mwana mpe ke salaka mutindu mosi. Tata ke sala, na yawu Munu

mpe ke sala na ntangu yayi.” Na nzonzolo yankaka, Nzambi vwandaka lakisa Yandi mambu ya kusala, mpe Yandi vwandaka kwenda mpe kusala mutindu yina. Yandi salaka kima ve kana Nzambi tubilaka Yandi ve na kusala. Amen. Yayi ke mambu yina salamaka ya kieleka. Kana beto lendaka kaka mpe kuingila tii Mpeve ke nata beto na kusala yawu! Ya ke mutindu yina. Mpe kuna kukotisa nionso na Klisto ti Yandi lendaka diaka ve kungisa beno mutindu Yandi ke salaka na munu, kasi na kidimbu ya ntete ya yintu ya Yandi, beno kubama mpe ata kima ve lendaka kanga beno nzila, samu beno zaba ti yina ke luzolo ya Nzambi.

<sup>42</sup> Yandi vwandaka na nsatu ya Ntwadisi. Yandi vwandaka Ntwadisi yina vwandaka ya kusiamisa. Yandi lendaka vwanda na nsi ya lutwadusu ya Ntwadisi yayi samu yandi zabaka ti Ntwadisi yayi vwandaka na nsi ya lutwadusu ya Nzambi. Yandi zabaka ti binkulu yina yandi vwandaka sadila, mbala yankaka na nzila ya ba Pharisien, ba-Sadducéen, mpe nionso yankaka, yandi sadilaka binkulu yina ntangu nionso mpe talaka kima mosi ve kusalama. Kasi awa me kwisa Muntu mosi, yina ke na kutuba ti Yandi ke Mesiya yina silamaka na Biblia. Kuna Yandi ke na kusalaka bisalu ya Nzambi. Yesu tubaka, “Kana Mu ke na kusala ve bisalu ya Tata ya Munu, na yawu beno kwikila Munu ve. Kasi kana beno lendaka kukwikila Munu ve, beno kwikila na bisalu yina Mu ke sala, samu ti yawu ke pesa kimbangi ya Munu.”

<sup>43</sup> Kuna, ata ntembe ve ti Nicodème lendaka tuba, “Mulongi, beto zaba ti Nge kele Longi yina me katuka na Nzambi, samu ti muntu ve lenda sala bima yina Nge ke sala kana Nzambi kele na Yandi ve.” Beno me mona, yandi vwandaka na nsatu ya Ntwadisi, ata ti yandi vwandaka mulongi ya kima yango. Yandi vwandaka mulongi ya dibuundu ya yandi. Yandi vwandaka na lukumu mingi, mpe yandi vwandaka—yandi vwandaka na bisika ya mfunu, mpe yandi vwandaka muntu ya nene; na ntembe ve ti, bantu nionso vwandaka zitisa yandi. Kasi samu na kubutuka ya mbala zole, yandi vwandaka na nsatu ya Ntwadisi! Mutindu mosi na beto mpe, yinga, beto vwandaka na nsatu ya Ntwadisi.

<sup>44</sup> Corneille, yandi vwandaka muntu ya nene, muntu ya lukumu. Yandi vwandaka tungisa bayinzo-Nzambi. Yandi vwandaka zitisa ba Juif samu yandi zabaka ti lukwikilu ya bawu vwandaka ya mbote. Mpe yandi vwandaka kabulaka na bamputu, mpe yandi vwandaka sambila konso kilumbu, kasi ntangu Mpeve-Santu kwisaka (Kima mosi yikamaka na dibuundu), yandi vwandaka na nsatu ya Ntwadisi. Nzambi tindaka yandi Mpeve-Santu. Yandi tindaka Yawu na Pierre, “Ntangu Pierre vwandaka zonga ntete Bampova yayi, Mpeve-Santu kulumukaka na yandi.” [Kisika ya mpamba na bande—Mu.] Nzambi sadilaka Ntwadisi na nzila ya Pierre. Yandi sadilaka Yawu, samu ti Yandi vwandaka twadisa Corneille

na nzila ya mbote. Mpe ntangu yandi vwandaka zonza ntete, Mpeve-Santu kulumukaka na Bantu ya makanda yina. Kuna yandi tubaka, “Muntu lendaka kuyimina masa, samu ti bayayi kuzwa mbotika ve?” Beno me mona, Ntwadisi vwandaka zonza diaka, Pierre ve. Samu ti yina vwandaka nkonga ya ba Juif. . . to ya Bantu ya makanda, “basumuki, ya kusumuka” samu na yandi, mpe yandi vwandaka zola ve kukwenda. Kasi Ntwadisi tubaka, “Mu me tinda nge.” Beno ke sala bima yina beno lendaka ve kusala, ntangu Ntwadisi ke baka lutwadusu nionso, na ntangu yina beno ke bika Yandi twadisa beno. Oh, wapi mutindu ya kele mbote na kuvwanda na lutwadusu ya Mpeve-Santu. Yandi kele Ntwadisi. Mbote. Yandi zonzaka na nzila ya Pierre mpe tubilaka yandi yinki yandi zolaka sala. Kuna na ntangu bawu nionso kuzwaka Mpeve-Santu, yandi tubaka, “Beto lenda ve kuyimina masa, na kutalaka bayayi me kuzwa Mpeve-Santu mutindu mosi na beto na mbandukulu.” Mpe ba botikaka bawu na Nkumbu ya Mfumu Yesu. Ntangu yayi, Nani twadisaka yandi na kusala yina? Ntwadisi yina vwandaka na kati ya yandi. Yesu tubilaka bawu ve, “Beno vwanda na boma ve na yina beno ke tuba, samu ti ya kele beno ve ke tuba; ya kele Tata yina ke zinga na kati ya beno, Yandi kele yina ke tuba?” Amen.

<sup>45</sup> Kalaki ya nene, yina katukaka na Jérusalem. Mpe Nzambi vwandaka na Ntwadisi na yinza na ntangu yina, Mpeve-Santu, mpe Yandi vwandaka na muntu kuna yina vwandaka ya kufuluka na Ntwadisi yayi. Yandi vwandaka ve longi, yandi vwandaka mutindu mwa diacre. Mpe yandi vwandaka kuna samu na kubelusa bambevo mpe kubasisa bampeve ya yimbi, mpe vwandaka yitukisa bantu, kiesa ya nene vwandaka na kati ya mbanza. Nkama ya bantu vukanaka na kisika ya yandi, mpe Ntwadisi tubaka, “Beto kwenda diaka ntama mingi ve, beto vutuka na nzila yayi.” Yandi salaka ntembe ve na Ntwadisi yayi.

<sup>46</sup> Kusala ata mbala mosi ve ntembe na Ndinga ya Ntwadisi ya beno. Landa Yandi. Kana beno zola ve, kuzimbana. Mpe, bambuka moyo ti, ntangu beno ke bika Yandi, beno ke vwanda beno mosi, samu na yina beto zola vwanda pene-pene ya Ntwadisi.

<sup>47</sup> Kuna na nzila, Yandi tubaka, “Ntangu yayi bika nkonga yayi, Philippe, mpe kwenda na ntoto ya kuyuma kisika muntu kele ve. Kasi Mu me tinda nge kuna, mpe ya ke vwanda na muntu kuna ntangu Mu ke nata nge kuna.” Tala kalaka ya nene yina kele yandi mosi yina ke kwisa, yandi vwandaka muntu ya nene samu na ntinu ya kento kuna na Éthiopie. Kuna yandi vwandaka kwisa, kutangaka Buku ya Ésaïe. Mpe Ntwadisi tubaka, “Kwenda pene-pene ya pusu-pusu.”

Mpe yandi tubaka, “Nge ke na kubakula yina nge ke na kutanga?”

48 Yandi tubaka, “Wapi mutindu mu lenda kubakula kana muntu ve kele samu na kutwadisa munu?” Oh, la la! Kasi Philippe vwandaka na Ntwadisi. Amen. Mpe yandi bandaka kaka na Disonuku yina, mpe longaka yandi Klisto. Amen. Ntwadisi! Yandi tubaka na yandi credo ve, yandi tubaka na yandi yina tadilaka Ntwadisi, Klisto! Mpe yandi botikaka yandi kuna na mwa masa. Kieleka, ya vwandaka. Oh, wapi mutindu mu zola yawu!

49 Na ntangu Israël basikaka na Égypte samu na yinsi ya nsilulu, na Exode 13:21, Nzambi zabaka ti ata mbala mosi ve ba lutilaka na nzila yina. Ya vwandaka kaka mafunda yiya ve bamille, kasi ba vwandaka diaka na nsatu ya kima yina ke tambula na bawu. Ba zolaka zimbana nzila. Na yina Yandi, Nzambi, fidisaka bawu Ntwadisi. Exode 13:21, kima mutindu yayi, “Mu me fidisa Wanzio ya Munu na ntwala ya beno, Dikunzi ya Tiya, na kukeba beno na nzila,” na kutwadisa bawu na yinsi ya nsilulu yayi. Mpe bana ya Israël landaka Ntwadisi yina, Dikunzi ya Tiya (na mpimpa), Dituti na ntangu. Ntangu Yawu vwandaka sikama, bawu vwandaka sikama. Ntangu Yawu vwandaka kwenda, bawu vwandaka kwenda. Mpe ntangu Yandi nataka bawu pene-pene ya yinsi, mpe ti ba vwandaka ve ya kukubama na kukota kuna, Yandi twadisaka bawu mbala mosi diaka na ntoto ya kuyuma. Yandi zolaka ve kukota na bawu.

50 Ya kele mutindu mosi, na dibuundu bubu yayi. Ntembe ve kasi yayi kele mvibudulu ya Nzambi bubu yayi, mutindu ya vwandaka na bilumbu ya Noé, dibuundu zolaka kwenda kana yawu vwandaka ya kusungama mpe vwandaka ya kukubama. Kasi Yandi fwana twadisa beto awa na kuna mpe awa na kuna mpe awa na kuna.

51 Israël zabaka ve ti, ntangu ba vwandaka boka, na kutalaka basoda yina fwaka ya Égypte, bampunda yina dyamaka, bapusu-pusu ya Pharaon ya kubaluka, ba kuzwaka lunungu ya bawu, Moïse na Kimpeve, vwandaka yimbilaka na Kimpeve, Miriam binaka na Kimpeve, mpe bana ya bakento ya Israël vwandaka kwenda mbangu kwaku na kuna na simu ya nzadi, na kuboka mpe kubinaka, ba vwandaka na mwa bitamina pene-pene na miliki mpe mafuta ya nyosi. Bawu zabaka ve ti bamvula makumi yiya ke luta, samu ti bawu bandaka kuzonza yimbi na ntwala ya Nzambi mpe ya Ntwadisi.

52 Mpe beto mpe me kuma na nzila kaka mosi. Mu ke kwenda na Shreveport na manima ya awa. Mpe Mpeve-Santu kulumukaka na Kilumbu ya kuvutula Matondo, bamvula makumi tanu me luta, na—na Louisiane, na Kilumbu ya kuvutula Matondo. Wapi mutindu dibuundu me kubwa kubanda kilumbu yina! Beno zaba ti dibuundu ya Rome ya Catholique na mbandukulu ya yawu vwandaka dibuundu ya pentecote? Ya ke kieleka. Ya ke ya kulunga. Ya vwandaka dibuundu ya pentecote, kasi bantu ya mutindu ya nganda ya misiku kotaka mpe balulaka Masonuku

ya Nzambi na binkulu ya bawu, yikaka na Yawu malongi, mpe yina yankaka. Mpe beno tala yinki kele na bawu na ntangu yayi, ata kima ya Masonuku kele na kati ya yawu ve. Bawu me yingisa kima mosi na kima yankaka, kitini ya dimpa na Mpeve-Santu. Bawu yingisaka kumwangisa masa na mbotika ya masa. Bawu yingisaka “Tata, Mwana, mpe Mpeve-Santu” na “Mfumu Yesu Klisto.” Bawu yingisaka mambu nionso yayi ya nene ya Nzambi yina pesamaka na beto, mpe ba kele ntama, ntama mingi, ntama na Malongi ya Masonuku.

<sup>53</sup> Mpe Pentecote kulumukaka na Louisiane, bamvula makumi tanu ya me luta, mpe kana ya vwandaka diaka na nkama zole ya bamvula, ya zolaka vwanda ntama kulutula dibuundu ya Catholique, kana yawu landila na kubwa mutindu ya vwandaka na makumi tanu ya bamvula yina me luta, samu ti bawu ke na kuyikaka kaka na yawu ntangu nionso, bambala nionso. Balongi ya ntangu ya ntama. Balukutakanu na nzila, beno lenda kuwa yawu diaka ve. Yina beto lenda kuzwa kele kikunku ya bima ya Hollywood ya kubwelama na yawu, bakento ya bansuki ya kuzenga ya nkufi yina ke vwataka bakupe, na kupakula, mpe nionso yina, ke kukibokilaka bawu mosi Baklisto. Mwa Ricky mosi na kitare, yina ke baka mbangu bisika nionso, mpe bakento na ba robe ya kukangama na nzutu mutindu. . . kaka mutindu saucisse ya francfort yina ba me katula mpusu, na kutala, ke ningana bisika nionso na zulu ya kikuma, ke kima bisika nionso na kisika ya malongi, ke bina na bima ya makutu, mpe kuzengisa nsuki mutindu kento ya mfumu ya yinsi, mpe kubokila yina Kimuklisto.

<sup>54</sup> Yina beto ke na yawu nsatu kele lukwikilu ya ntangu ya ntama, yina Nzambi tindaka, yina ke yoka mpe ke nyengisa bima ya yinza na dibuundu. Beto fwana vutuka na Mpeve-Santu mpe na Tiya, kuvutuka na yina ke katulaka mvindu nionso mpe kuyoka yawu, na yina ke vutulaka malongi ya ntangu ya ntama, kusala ti Zulu kuvwanda kima mosi ya zulu, mpe difelo kima mosi ya tiya, mutindu munduki. Beto kele na nsatu ya malongi ya mutindu yina. Kana beno sala yawu bubu yayi, dibuundu ya beno ke basisa beno.

<sup>55</sup> Bantangu yankaka balongi ya mbote ke katukaka nzila samu na dibuundu ya bawu. Yawu yina mu kele ve na denomination. Mu ke na kimfumu mosi, yina kele na Zulu. Kisika nionso Yandi ke tinda munu, kuna mu ke kwenda. Nionso yina Yandi ke tuba, mu ke tuba. Beto zola ata denomination ve. Kana dibuundu yayi kuma denomination, kuna kaka beno me zimbisa pasteur ya beno. Mu ke wumela munu na yawu ve, ata bamuniti tanu ve. Konso dibuundu yina kumaka denomination yawu bebaka, mpe beno zabisa munu mosi yina bebaka ve, mpe beno zabisa munu mosi yina telamaka diaka. Ba tindaka Mpeve-Santu samu na kutwadisa dibuundu, kasi mwa nkonga ya bantu ve. Mpeve-



Santu keke ya kulutila ndwenga. Bantu ke kuma ya mutindu ya nganda, ya kuswaswana.

<sup>56</sup> Nzambi tubaka na bawu ti Yandi ke tinda bawu Ntwadisi, Yandi ke twadisa bawu na nzila. Mpe ntangu nionso yina ba vwandaka landa Dikunzi ya Tiya, nionso vwandaka mbote. Yandi twadisaka bawu tii na mwelo ya yinsi ya nsilulu, mpe kuna yina vwandaka kaka kisika yina Yandi lendaka kukuma. Kuna Josué, munwani-mvita ya ngolo, beno ke bambuka moyo na kilumbu yina yandi tubaka na bawu, “Benó kukisantisa, na bilumbu tatu Nzambi ke fungula Jourdain awa mpe beto ke sabuka?” Ntangu yayi beno tala yinki yandi tubaka (mu zola yawu) na Disonuku, yandi tubaka, “Benó vwanda pene-pene na manima ya Sanduku, samu beno me lutaka ntete na nzila yayi ve.”

<sup>57</sup> Yinki vwanda Sanduku? Ndinga. Benó landa ve banzila ya ba denomination ya beno na ntangu yayi, beno vwanda na manima ya Ndinga, samu beno me lutaka ntete na nzila yayi ve. Mpe, mpangi, kana ya keke na ntangu yina dibuundu ya Baklisto zolaka zikisa yawu mosi, ya keke ntangu yayi. Beto keke ya kieleka awa na kisika yina lukutakanu yayi ya nene keke na kusalamaka na Rome na ntangu yayi, baluswaswanu keke na kusalamaka, kuvukana ya mabuundu, na yina ba denomination nionso yayi ke vukana kintwadi samu na kusala kifwani ya niama, kaka mutindu Biblia tubaka. Mpe beno zaba yinki beto me tuba na Bansangu ya suka yayi. Mpe beto me kuma kisika yango, pene-pene ya beto na kielo, mpe bantu ke na landa kaka credo mosi. Benó keke na kusalaka mbote na kuvwanda na manima ya Ndinga! Ndinga ke twadisa beno na lweka yankaka, samu ti Ndinga keke Klisto, mpe Klisto keke Nzambi, mpe Nzambi keke Mpeve-Santu.

<sup>58</sup> Benó vwanda na manima ya Ndinga! Oh, yinga, tata! Benó vwanda na Ntwadisi yina. Benó vwanda kaka na manima ya Yandi. Kuvwanda ve na ntuala ya Yandi, benó vwanda na manima ya Yandi. Bika Yandi twadisa beno, benó twadisa Yandi ve. Benó bika Yandi sala nionso.

<sup>59</sup> Josué tubaka, “Ntangu yayi, beno me lutaka ntete na nzila yayi ve, beno zaba kima mosi ve na yina me tadila nzila.”

<sup>60</sup> Yina keke diambu bubu yayi. Benó zola ve ti ntwadisi na kutwadisa beno kuna na nzila ya nene. Oh, beno zaba babalabala nionso mpe bima yankaka nionso. Benó zaba nzila nionso ya disumu. Ya keke ve. . . Oh, beno me vwanda ntangu mingi na nzila yayi. Benó ke na nsatu ve ti muntu tubila beno na yina me tadila yawu, beno zaba banzila nionso ya fioti-fioti. Yina keke kieleka, konso disumu, beno zaba nionso na yina me tadila yawu. Muntu ve lenda tuba na beno wapi mutindu ya kuyiba; beno zaba yawu. Muntu ve lenda tuba na beno wapi mutindu ya kuvwenza; beno zaba yawu. Muntu ve lenda tuba na beno wapi mutindu ya

kusala bima ya yimbi yayi, samu ti ya kele ya kusonama na konso yinti bisika nionso.

<sup>61</sup> Kasi, beno bambuka moyo, beno bantu yina kele Baklisto, beno me lutaka kuna. Beno kele na kati ya Yinsi yankaka. Beno me butuka ya mbala zole. Beno ke na kati ya Yinsi, Yinsi ya Mazulu. Beno ke na kati ya Yinsi ya nsilulu.

<sup>62</sup> Beno lenda tala, beno zaba nzila ya beno awa. Oh, la la, yinga. Beno zaba mutindu—mutindu, wapi mutindu ya kubula nsaka ya bakalati. Beno zaba kubula zeke, ntangu ya ke balukaka, yinki ya zola tuba, mpe nionso yina. Kasi ntangu ya ke kuma na kuzaba busantu mpe mambu ya busantu mpe ngolo ya Nzambi, mpe wapi mutindu Mpeve-Santu ke salaka mpe yinki Ya ke salaka, beno ke sala mbote na kuvwanda na manima ya Ndinga, Ntwadisi. Beno me mona? Beno me lutaka ntete na nzila yayi ve.

<sup>63</sup> Mbote, beno ke tuba, “Mu vwandaka bakala mosi ya mayele mingi, mu kuzwaka—mu kuzwaka badiplome zole na collège.” Beno ke sala mbote na kuzimbana yawu. Yinga, tata.

<sup>64</sup> “Mu me lutila na baseminere.” Beno ke sala mbote na kuzimbana yawu. Yinga. Beno ke sala mbote na kuvwanda na manima ya Ntwadisi. Bika Yandi twadisa beno. Yandi zaba nzila; beno zaba ve. Beno me lutaka ntete na nzila yayi ve. “Mbote,” beno ke tuba, “bawu lenda sala yawu.”

<sup>65</sup> Beto tala kana bawu lendaka. Yesu tubaka, “Bayina ke luta nzila yayi, bidimbu yayi ke vwanda na bawu. Na Nkumbu ya Munu, bawu ke basisa bampeve ya yimbi, kuzonza bandinga ya malu-malu; to kusimba banyoka to kunwa manganga ya yimbi yina ke kufwaka, yawu ke sala bawu kima ve. Kana bawu tetika maboko na bambevo, bawu ke beluka.” Mingi kati ya bawu ke mangaka Yawu, ke ndimaka Yawu ve, ke tuba ti Yawu me twadisama ve na kimpeve. Bawu ke landa Ntwadisi ve. Bawu ke landa kinkulu yina muntu me sala. Beno ke sala mbote na kuvwanda kaka na manima ya Ndinga, samu beno lutaka ntete na nzila yayi ve, beno zaba.

<sup>66</sup> Kasi beno me butuka ya mbala zole, mpe beno me kuzwa busantu na mbutukulu yina. Beno lutaka ntete na nzila yayi ve. Beno me lu- . . . Kana beno luta nzila yayi, beno fwana lutila na busantu, samu ti ya kele Yinsi ya malu-malu, Luzingu ya malu-malu, bantu ya malu-malu.

<sup>67</sup> Beno ke kwisa na dibuundu mpe beno ke wa muntu mosi kutelama, kuboka ngolo, “Nkembo na Nzambi! Alleluia!”

<sup>68</sup> Samu na yinki, beno ke tuba, “Mbote, ata mbala mosi ve ba me salaka yayi na dibuundu ya munu! Mu ke telama mpe kubasika!” Um-hum. Beno me mona? Sala keba.

<sup>69</sup> Beno vwanda na manima ya Ndinga, ntangu yayi, bika Ntwadisi kutwadisa beno. “Yandi ke twadisa beno na kati ya

Kieleka nionso, mpe ke talisa bima yina Mu tubaka na beno. Yandi ke lakisa beno yawu. Yandi ke tuba na beno bima yina ke kwisa,” Ntwadisi ya kieleka. Kukwenda ve na evêque; kwenda na Ntwadisi. Kukwenda ve na muntu yankaka kasi na Ntwadisi. Yandi kele Yandi yina ba tindaka na kutwadisa beno. Yandi kele Yandi yina ke sala yawu. Nzambi pesaka beno Ntwadisi. Baka nzila yina Nzambi kubikaka.

<sup>70</sup> Diambu na yawu bubu yayi kele, ti bantu yina ke kwisaka na dibuundu ke vwandaka kaka baminiti fioti, kima mosi ke salama yina bawu me mesanaka ntete ve.

<sup>71</sup> Mu sepelaka mingi na mwa kento mosi ya dibuundu ya madidi ya mambu ya nganda, ntama mingi ve me sambila samu na yandi. Nzambi ke belusa mwa kento yayi ya leke. Yandi bakulaka yayi ve. Yandi zabaka kima mosi ve samu na yawu. Yandi me kota, yandi me tuba ti yandi zabaka ve. Kasi mu tubaka na yandi, “Kwisa tala munu.” Yandi vwandaka na mwa boma mpe boma, kasi Ntwadisi landilaka kutuba na yandi, “Kwenda na ntwala.” Yandi kuzwaka yawu. Yawu yina. Beno me mona, ya ke samu Mpeve-Santu yina ke twadisaka beto na bima yayi. Beno me mona, Nzambi me kubikaka nzila mosi.

<sup>72</sup> Beno me talaka ntete. . . Beno me monaka ba-oie ya mfinda kuluta na zulu, mabata kukwenda na sude? Mbote, awa beno bambuka moyo, mwa dibata yina ya kuluntu butukaka kisika mosi kuna na diyanga. Yandi zaba ve este, node, weste, mpe sude. Yandi zabaka kima ve kasi kaka diyanga yina vwandaka kuna na zulu ya bamongo ya Canada. Ata mbala mosi ve yandi basikaka na diyanga yina, kasi yandi vwandaka ntwadisi. Mwa mabata ya bakala yina butukaka samu na kuvwanda ntwadisi. Mpe kilumbu mosi, na mpimpa mosi kuna mvula mosi ya ngolo ya mpembe katukaka na zulu ya bamongo kubwaka. Yinki salamaka? Mupepe ya madidi ya kukondwa ngolo yina salaka kuna. Mu lendaka tala yandi ke tekita, kutuba, “Mama, yinki yayi zola tuba?” Beno me mona, ntete yandi zaba madidi ya mutindu yina ve. Yandi me banda kutala na kizunga, yandi me banda kutala na kizunga ya simu ya diyanga, ya me banda kukangama na madidi, ngalasi ke na kubakaka diyanga. Yandi zabaka ve, kasi na mbala mosi. . . Yandi butamaka samu na kuvwanda ntwadisi ya nkonga yayi ya mabata. Yandi ke tambula na kati-kati ya diyanga yayi na ntangu ya lendaka kubaka yandi. Beno lendaka bokila yawu yina beno zola. Beto ke bokilaka yawu lutwadusu ya kimpeve, to beno lendaka bokila yawu, oh, kaka dibanza ya kimuntu, nionso yina ya lendaka vwanada. Yandi ke tambula na kati-kati ya diyanga yayi, ke telemisa mwa yinwa yina na zulu, mpe ke boka, “Kwin-kwin, kwin-kwin!” Mpe konso dibata ya diyanga ke landa yandi kaka. Samu na yinki? Bawu zaba ntwadisi ya bawu, kaka na mutindu ya yandi ya kuboka.

<sup>73</sup> “Kana kulumenta ke na kupesa ve muningu ya mbote, nani lendaka kubama samu na mvita?” Kieleka. Nani lendaka

kukubama samu na mvita kana kulumenta ke na pesa ve muningu ya mbote?

<sup>74</sup> Mbote, kana mwa dibata yayi pesa ve kuboka ya mbote, nani ke kubama samu na kupumbuka? Mwa dibata yayi ya kuluntu ke telemisa na zulu mwa yinwa ya yandi kuna, mpe ke boka, “Kwin-kwin, kwin-kwin!” Mpe konso dibata ke kwisa na yandi. “Kwin-kwin, kwin-kwin!” Awa bawu yayi. Bawu ke kuzwa mutindu mukembo mosi, kaka kuna na kati-kati ya diyanga yayi, ke baluka kaka mpe ke baluka mpe ke baluka. Na manima ya mwa ntangu fioti yandi ke tala kima kusala na yandi, yandi fwana kwenda. Yandi ke yidika mwa mapapu ya yandi mpe ke pumbuka na diyanga yayi, ke kwenda na zulu mpe ke baluka bambala yiya to tanu, mpe kukwenda na ndonga na Louisiane mutindu kaka yandi lendaka kukwenda, konso dibata na manima ya yandi. “Kwin-kwin, kwin-kwin,” awa yandi ke kwisa. Samu na yinki? Yandi kele ntwadisi! Amen! Mabata zaba ntwadisi ya bawu, kasi dibuundu ve. Yinga, yandi zaba yinki ya kusala.

<sup>75</sup> Beno tala ba-oie yayi ya kuluntu, bawu nionso na ndonga ke katuka na Alaska. Ntangu yayi, ya ke vwandaka ntangu nionso na oie mosi ya bakala ya kuluntu yina ke twadisaka bawu, mpe ba-oie yayi fwana tala mbote-mbote na oie yina. Bawu fwana zaba yinki oie yina ya bakala kele na kutubaka. Beno tangaka yawu kuna na magazine *Look* bamvula yiya me luta, kisika yina oie mosi ya bakala ya kuluntu na ntangu mosi zabaka ve yinki yandi vwandaka sala? Mpe yandi twadisaka nkonga ya ba-oie kuna na Angleterre. Yina kele ya kieleka. Ata mbala mosi ve ba monaka bawu na Angleterre. Samu na yinki? Ata mbala mosi ve bawu landaka ntwadisi ya bawu—ya bawu. Oie yina ya nkulu zabaka ve kisika yina yandi vwandaka kwenda. Mpe ntangu yayi bawu kele kuna mpe lendaka vutuka ve.

<sup>76</sup> Yina kele diambu yina kele na kati ya ba-oie nionso yayi bubu yayi, bawu ke tambulaka ntete na nkonga. Ba ke tubaka, magazine *Look* yina tubaka ti, ba-oie yayi ke tambulaka na nkonga mpe ke pumbuka na zulu kuna ya Angleterre, kasi bawu zaba ve mutindu ya kuvutuka. Yina kele mutindu mosi na mwa *ba-oie* yina mu zaba. Beno ke vwanda kintwadi, mpe lukutakanu ya nene ya reveil, mpe kubokila mwa longi yina ke vumbula lukwikilu na kulonga samu na mwa ntangu fioti, kasi beno zaba ve kisika yina beno ke kwenda. Beno ke tambula kintwadi na kubaluka mpe ke baluka, samu ti beno kele na mwa oie mosi ya bakala yina ke twadisa beno na kusala feti ya denomination; mpe kuvutula beno ve na Ndinga ya Nzambi, kuvutula beno ve na mbotika ya Mpeve-Santu. Mpe kuna beto ke kukiyufula samu na yinki beto lenda kuzwa ve reveil na bilumbu ya beto. Um-hum. Beno me mona? Beno fwana kuzwa Muningu yina ya luswaswanu! Muningu yina kele kulumenta ya Nsangu ya mbote yina ke basisaka Nsangu ya mbote, konso Ndinga ya Nzambi. Credo ve, denomination ve; kasi Biblia, Mpeve-Santu. “Bidimbu

yayi ke vwanda na bayina ke kwikila.” Beno me mona? Mpe kuna bawu ke landa nzila.

<sup>77</sup> Oie mosi ya kuluntu ya bakala mbala mosi, ba zonzaka ti, yandi salaka ti nkonga mosi kufwa, na kumekaka na kunata bawu kupumbuka na mudidi, yandi zabaka ve kisika yina yandi vwandaka kwenda, yandi mosi, mpe bawu nionso kwendaka tuta bamongo kuna, mpe ndambu ya bawu bitini ya nzutu katukaka, bawu mwanganaka. Kieleka! Bawu fwana zaba muningu ya bawu ya luswaswanu. Mwa dibata yina ya kuluntu, kana yandi kele na muningu ya kuswaswana mpe bantu nionso zabaka yawu, bawu lendaka vwanda na mwa kuvukana ya kintwadi ya nkembo mpe bawu ke kwenda na sude. Samu na yinki bawu kwendaka kuna? Kuna sika ya madidi.

<sup>78</sup> Ntangu yayi, kana Nzambi lendaka pesa dibata kiyeka ya kuzaba mutindu ya kutina madidi, wapi mutindu Yandi lendaka ve kupesa yawu na dibuundu? Kana mabata lendaka sala yina na nzila ya dibanza ya niama, wapi mutindu Mpeve-Santu lendaka sala yawu ve na kati ya dibuundu? Yawu fwana twadisa beto na kukatuka misiku ya ntama mpe ba credo mpe bima, na kati ya nkembo, na mbotika ya mbote ya Mpeve-Santu. Yawu ke nataka ngolo, luzabu, mvibudulu, kinzambi, mpe Mpeve-Santu. Ya kele na yina Ntwadisi ya kieleka ke twadisa, samu ti Yandi ke basisa kima yankaka ve kasi Nsangu ya mbote, kaka Ndinga ya Nzambi. Kieleka, beno kele na nsatu ya Ntwadisi!

<sup>79</sup> Ntangu, bantu ya ndwenga, bawu zaba kima mosi ve na yina me tadila Nzambi. Bawu vwandaka—bawu vwandaka sadila bunganga-nkisi, banganga-nkisi. Ba vwandaka kuna na esete. Beno zaba, Biblia ke tuba, “Beto me mona Mbwetete ya Yandi na Este, beto me kwisa kusiika Yandi.” Bawu vwandaka ya weste, bawu talaka na este mpe monaka Mbwetete ya Yandi. . . to talaka na weste, bawu vwandaka na Este. “Beto vwandaka na Este, mpe me mona Mbwetete ya Yandi na weste.” Beno me mona? “Beto me mona Mbwetete ya Yandi na Este.” Mpe, beno tala, bawu vwandaka na Este. “Ntangu beto vwandaka na Este beto monaka Mbwetete, mpe beto me kwisa kukembila Yandi.”

<sup>80</sup> Mu lendaka tala bantu yango kukubama na kukwenda. Mu lendaka tala mosi ya bakento ya bawu kutuba na yandi, kutuba, “Mu tuba, nge me kanga bima nionso, kasi wapi boussole ya nge?”

Yandi tubaka, “Mu—mu ke sadila boussole ve mbala yayi.”

<sup>81</sup> Yandi tubaka, “Wapi mutindu nge ke sala na kukwenda na lweka yankaka ya bamongo?” Beno bambuka moyo ti, ba zolaka sabuka Nzadi Tigris mpe kuluta na banseke, mpe . . . samu na yinki, ba vwandaka na nzyetolo ya bamvula zole na zulu ya bakamela. Wapi mutindu ba ke sala yawu? Yandi tubaka, “Mbote, nge ke baka ve boussole.”

Yandi tubaka, “Ve.”

“Wapi mutindu nge ke sala?”

<sup>82</sup> “Mu ke baka nzila yina Nzambi kubikaka. Mbwetete yina na zulu ke twadisa munu tii na Ntinu yina.” Yawu yina.

<sup>83</sup> “Beto me mona Mbwetete ya Yandi na Este, mpe beto me landa Yawu tii awa na weste, samu na kukembila Yandi. Wapi kisika Yandi kele?” Bawu landaka nzila yina Nzambi kubikaka. Bawu vwandaka ya kukangama kuna na kati ya mingi ya ba credo na mwa ntangu fioti. Bawu kotaka na Jérusalem mpe bandaka na kumata mpe kulumukaka na bala-bala, bantu yayi ya kulwata mbote, na kutubaka, “Wapi kisika Yandi kele? Wapi kisika Yandi yina me butuka Ntinu ya ba-Juif?” Mbote, yina vwandaka mbanza-kimfumu, yina vwandaka Jérusalem. Kieleka ti dibuundu ya nene zabaka mwa kima mosi na yina me tadila Yawu. “Wapi kisika Yandi kele? Wapi kisika Yandi yina Ntinu ya ba-Juif me butuka? Beto me mona Mbwetete ya Yandi na Este, beto me kwisa kembila Yandi. Wapi kisika Yandi kele?”

<sup>84</sup> Kasi, bawu kwendaka na pasteur *Kingandi* mpe nganga-Nzambi ya mbuta *Kingandi*, muntu ve ya bawu zabaka kima na yina me tadila Yawu. “Kasi, ya kele na Mosi yina me butuka Ntinu ya ba-Juif, wapi kisika Yandi kele?” Bawu zabaka ve.

<sup>85</sup> Kasi ya vwandaka na nkonga mosi ya mivungi kuna na nsi ya mongo ya fioti bawu kuzwaka ntangu mosi ya kiese, yinga, tata, samu ti bawu landaka nzila yina Nzambi kubikaka.

<sup>86</sup> Na yawu bawu vwandaka kuna, mpe mbala mosi yandi tubaka, “Mu ke zabisa beno yinki beto fwana sala, beto fwana kuvukana.” Kuna ba me bokila Kimvuka ya Bakuluntu na kuvukana, mpe—mpe vwandaka kukiifula kana bawu kuwaka kima na yina me tadila Yawu. “Ve, beto zaba kima mosi ve na yina me tadila Yawu.”

<sup>87</sup> Ya kele mutindu mosi bubu yayi. Bawu zaba kima mosi ve na yina me tadila Ntwadisi yayi, Mpeve-Santu yina ke belusaka, ke fulusaka, ke vulusaka, yina ke kwisa diaka. Ntwadisi yina me zabisa beto bima yayi nionso salamaka, awa beto kele ya muvimba na kati ya yawu. Yina ke swasikisaka mabanza ya ntima; bawu zaba kima mosi ve na yina me tadila Yawu, bawu ke bokilaka Yawu mabanza ya bantu to kima mosi. Bawu zaba ve yinki ya kutuba na yina me tadila Yawu.

<sup>88</sup> Kuna, beno tala, bantu ya ndwenga yango, ntangu nionso yina... Beno bambuka moyo ti, ntangu bawu kotaka na Jérusalem, Mbwetete zimbanaka. Mpe ntangu nionso yina beno ke tala na ba credo mpe na muntu ya denomination samu na kutwadisa beno na Nzambi, lusalusu ya Nzambi ke bika beno. Kasi ntangu yawu ke lutila bawu, mpe ke bika yawu, ke bika ba credo mpe ba denomination ya ba-Juif yina, mpe kubasika na Jérusalem, kuna Mbwetete monanaka diaka mpe bawu vwandaka na kiese ya kulutila mingi. Bawu monaka mbala mosi diaka Ntwadisi! Oh, wapi mutindu ya kele, na kuvwanda

na mwa dibuundu ya nkulu ya madidi ya misiku, mpe kuna kuvutuka na mosi ya mbote yina ke na tiya, kumona Ntwadisi kutwadisa, wapi mutindu luswaswanu kele! Yinga, “Beto me mona Mbwetete ya Yandi na Este mpe me kwisa kembila Yandi.”

<sup>89</sup> Josué tubaka na bawu, “Ntangu yayi beno landa Sanduku, samu ti ata mbala mosi ve beno me lutaka ntete na nzila yayi ve.” Nzambi ke pesa muswa ve ti Sanduku yina kukwenda kisika yankaka kasi kaka na ntwala. Muntu nionso landaka Yawu, mpe Yawu sabukaka Jourdain.

<sup>90</sup> Mutindu mosi bubu yayi, na nzila ya Mpeve-Santu. Yinga, tata. Kima kaka mosi yina beto zaba, kana ya kele Mpeve-Santu to ve, beto ke mona kumonisa- . . . kumonisama ya Yawu, kumonisama yina ke siamisa Ndinga ya Nzambi.

<sup>91</sup> Ntangu yayi, ntangu mingi ve, nkonga mosi ya bampangi-babakala vwandaka na menga mpe mafuta, mpe yina nionso kele mbote kana bawu zola kusala mutindu yina. Munu . . . Yina kele ve kusiamisa samu na munu. Masonuku kele yina ke siamisa, beno me mona, ntangu nionso yawu ke siamisa yina Nzambi tubaka, yina kele nionso mbote. Bawu ke tuba, “Yayi ke talisa samu na yinki beno kele na Mpeve-Santu, beno kele na mafuta na diboko.” Ntangu yayi, mu—mu lenda ve kundima yina. Beno me mona? Ve, mu lenda kwikila ve ti mafuta yina kele na kima ya kusala na yawu. Mpe kana menga yina ke belusa mpe ke pesa mpulusu, yinki ke salama na Menga ya Yesu Klisto? Kana mafuta yina ke belusa, yinki ke salama na bamputa ya Yandi? Beno me mona? Beno me mona?

<sup>92</sup> Mu ke zolaka ntangu Ntwadisi ke kwisaka, yina ke nata beno na Kieleka ya Ndinga, kuna beno zaba ti beno ke kwenda na ntwala mpe beno kele ya kukubama samu na bilokolo ya nsuka. Yina kele kieleka, beno ke na kukubamaka samu na kupumbuka. Yinga, tata. Yinga, samu na yinki? Ntwadisi kele Yandi Yina ke kumisaka yawu kieleka.

<sup>93</sup> Mu kele na Disonuku awa, mu pesaka Masonuku yayi, kasi mu zola kutanga yayi. Ya ke na mukanda ya Zole ya Pierre, kapu ya 1, na nzila ya 21.

*Ya kieleka . . . ata profesu mosi ve pesamaka na bantangu ya ntama na lusalusu ya luzolo ya muntu: kasi ya kele Mpeve-Santu yina tumisaka na bantu ya santu na kuzonza na nkumbu ya Nzambi.*

<sup>94</sup> Wapi mutindu profesu vwandaka kwisa? Na nzila ya luzolo ya muntu ve, ba credo ya ba denomination; kasi na luzolo ya Nzambi, ntangu bantu ya santu vwandaka tuba na nzila ya Mpeve-Santu. Yandi ke vwandaka konso ntangu Ntwadisi ya Nzambi. Yina vwandaka Mpeve-Santu yina vwandaka na kati ya Dikunzi ya Tiya, yina vwandaka Mpeve-Santu, konso muntu zaba ti yina vwandaka Klisto. Moise katukaka na Égypte, talaka ti nsoni ya Klisto vwandaka kimvwama ya kulutila nene na

yina ya Égypte. Yina vwandaka Klisto. Mbote, na ntangu bawu vwandaka kuna mpe vwandaka tuba, “Mbote, Nge ke tuba ti Nge kele. . . Kasi, Nge me luta ve bamvula makumi tanu, mpe Nge ke tuba ti Nge monaka Abraham?”

<sup>95</sup> Yandi tubaka, “Na ntuala Abraham kubutuka, MU KELE.” MU KELE Yandi yina kutanaka na Moise na Dikunzi ya Tiya na kati ya mulaka ya tiya. Yinga, tata. Yandi vwandaka Nzambi na nzutu. Muntu ya tatu ve; Muntu mosi kaka na kisalu yankaka. Banzambi tatu ve; bisalu tatu ya Nzambi mosi. Ya kulunga.

<sup>96</sup> Mbote, ntangu yayi, Masonuku. Konso ntangu, ntangu Nzambi ke kubikaka, Yandi ke kubikaka ya kulutula mbote. Ntangu Nzambi ke kubikaka nzila samu na kupesa ngolo na dibuundu ya Yandi, Yandi ke kubikaka ya kulutula mbote. Ntangu Yandi pesaka Adam na Ève, na disamba ya Éden, yina Yandi pesaka bawu vwandaka Ndinga ya Yandi. “Beno vwananda na manima ya Ndinga yayi, mpe beno ke vwananda na lukengolo ya mbote. Kasi kana beno basika na Yawu, beno ke kufwa kilumbu yina beno ke kudia yawu.” Ata mbala mosi ve Nzambi me sobaka mutindu ya Yandi ya kusadila. Mpe ata mbala mosi ve Satana me sobaka ya yandi; Mutindu yina yandi kotaka na Adam na Ève, yandi ke kota na bantu bubu yayi. Wapi mutindu? Na nzila ya kumeka kuyindula na Yawu. “Ntangu yayi, ya ke monika ti Nzambi lendaka sala yawu ve. Oh, Nzambi tubaka,” me tuba Satana, “kasi kieleka Nzambi ya santu lendaka sala yawu ve.” Kieleka Yandi ke sala, samu Yandi tubaka ti Yandi ke sala!

<sup>97</sup> Mpe yina kele yina bantu ke tubaka bubu yayi, “Oh, ntangu yayi vingila ntete! Beno ke banza ve ntangu yayi ti, kana mu ke kwendaka na yinzo-Nzambi mpe mu ke futaka mosi ya kumi ya bima ya munu nionso, mpe mu ke salaka *yayi, yina*, ti kuna Nzambi ke tula munu na ngaanda?” Kana muntu butuka diaka ve mbala zole, yandi lenda bakula ve Kimfumu ya Nzambi! Beno me mona? Lemvo kele ve! “Mbote, kiboba ya kyadi ya bakala, kiboba ya kyadi ya kento, ya kele moyo mosi ya mbote.” Nzila mosi kaka yina ba lenda mona Nzambi, kele kubutuka ya mbala zole. Kaka yina. Mu ke tala ve wapi mutindu fioti, wapi mutindu ya ke mbuta, wapi mutindu ya ke ntwenia, yinki bawu salaka, bambala yikwa bawu kwendaka na yinzo-Nzambi, wapi lutangu ya ba denomination yina bawu zaba, wapi lutangu ya ba credo yina bawu zaba na ntima mpe lenda tanga na ngolo. Beno fwana butuka mbala zole to beno ke ya kusungama ve, na kubanda. Yina kele nionso ya kulunga.

<sup>98</sup> Kuna, beno me mona, beno kele na nsatu ya Ntwadisi. Yandi ke twadisa beno na Kieleka, mpe Kieleka kele Ndinga. Yandi ke twadisa beno. Mpe ya kele konso ntangu mutindu yina. Ata mbala mosi ve Nzambi ke soba kima mosi, samu ti Yandi kele na nsuka ve mpe Yandi zaba yina kele ya kulutula mbote. Yandi kele yina kele kisika nionso, Yandi kele yina zaba nionso, Yandi



kele—Yandi kele nionso. Ya kieleka, yawu yina Nzambi kele, na yina Yandi lenda soba ve. Mbote mingi.

<sup>99</sup> Yandi kele Yina ke siamisa nzila yina Yandi ke twadisa beno. Mpeve-Santu, Ntwadisi, kele Yina ke siamisa Ndinga yina Yandi ke longa. Ntangu yayi, Ntwadisi twadisaka Luc, na kutubaka, “Beno kwenda na yinza ya muvimba, beno longa Nsangu ya mbote na bantu nionso. Muntu yina ke kwikila mpe ke baka mbotika yandi ke kuzwa mpulusu, muntu yina ke kwikila ve ke kuzwa kitumbu. Bayina ke kwikila ke vwanda na bidimbu yayi; na Nkumbu ya Munu bawu ke basisa bampeve ya yimbi, ke tuba bandinga ya malu-malu, kana bawu simba banyoka na maboko, kunwa manganga ya yimbi yina ke kufwaka bantu, bawu ke tetika maboko na bambevo mpe bawu ke beluka.” Mpe Biblia ke tuba ti, “Bawu kwendaka bisika nionso,” bawu twadisamaka na Ntwadisi, beno zaba, “bawu longaka Ndinga, mpe bindimbu vwandaka na bawu.” Yinki ya vwandaka? Ntwadisi vwandaka siamisa ti Yina vwandaka Kieleka!

<sup>100</sup> Yina vwandaka mutindu ya Nzambi ya kusala. Yina kele nzila yina pesamaka. Yina kele manaka ya Yandi; Yandi lenda soba yawu ve, samu ti Yandi kele na nsuka ve. Amen. Yandi lenda soba yawu ve; Yandi kele Nzambi. Mu lenda soba; Mu kele muntu. Beno lenda soba; beno kele bakala to kento. Kasi Nzambi lenda soba ve. Mu zaba nionso ve; mu lenda sala bifu mpe kutuba mambu ya yimbi, beto nionso lenda sala yawu. Kasi Nzambi lenda sala yawu ve, mpe kuvwanda Nzambi. Lukanu ya Yandi ya ntete kele ya kulunga. Mutindu Nzambi ke salaka, yina kele mutindu yina Yandi fwana sala konso ntangu. Kana ba bokila Yandi na kimalu samu na kuvulusa sumuki, Yandi ke vulusa yandi na nzila ya kima mosi. Mbala yankaka musumuki ke kwisa, Yandi ke sala kaka mutindu mosi, to Yandi salaka yimbi ntangu Yandi salaka na mbala ya ntete. Amen. Mu zola Yandi. Mu zaba ti ya kele Kieleka.

<sup>101</sup> Mu ke na bamvula makumi tanu na tatu, mpe ya me kuma na bamvula makumi tatu na tatu na ndambu kubanda mu ke na kulongaka Nsangu ya mbote awa, ata mbala mosi ve mu me monaka Yawu kubwa. Mu me monaka Yawu kumekama bambala sambwadi bisika nionso na yinza, na kati ya mutindu nionso ya bansambulu mpe bima nionso yankaka yina, mbala mosi na ntwala ya bantu kati-kati ya million mosi, mpe ata mbala mosi ve Yawu bwaka. Mu ke tubila ve mwa buku mosi, mu me zonza landila kimbangi ya munu mosi, ti mu zaba ti Nzambi ke vwandaka na manima ya Ndinga ya Yandi mpe ke zitisa Yawu. Ntangu yayi, kana beno kele na mwa kima mutindu credo, beno fwana keba na yawu. Kasi Mpeve-Santu ke lungisa Ndinga ya Nzambi.

<sup>102</sup> Na Santu Jean, na kapu 1 mpe na nzila ya 1, yandi me tuba ti Yandi kele Ndinga, Yandi kele Ntwadisi: “Na mbandukulu Ndinga vwandaka, Ndinga vwandaka na Nzambi, mpe Ndinga

vwandaka Nzambi. Mpe Ndinga kumaka muntu mpe zingaka na kati ya beto.” Oh, la la!

<sup>103</sup> Pierre twadisamaka na kutuba, na Actes 2:38, wapi mutindu ya kuzwa Mpeve-Santu, yandi tubaka, “Beno balula bantima, mpe konso muntu na kati ya beno, botama na Nkumbu ya Yesu Klisto samu na lemvo ya masumu ya beno, mpe na yina Ntwadisi ke nata beno.” Yinga, yina kele kima ya kusala. Ya ntete, kundima masumu ya beno, kukondwa lukwikilu ya beno, samu ti beno kwikilaka ve na bima yayi. Beno balula bantima, mpe na yawu beno botama, mpe na yina Ntwadisi ke nata beno. Beno me mona, yina kele kisalu ya beno. Kisalu ya beno kele kubalula bantima. Kisalu ya beno kele kubotama. Mpamba ve yina ke kisalu ya Ntwadisi na kunata beno, kutwadisa beno kubanda na ngolo tii na luzabu, tii na lembami, tii na mvibudulu, tii na kinzambi, mpe tii na zola ya bampangi, mpe Mpeve-Santu ke kanga beno. Beno me mona? Kuna beno me kuma na kitezo ya kufuluka na kifwani ya Nzambi, muntu mosi ya mbote ya Nzambi, kento mosi ya mbote ya Nzambi, ya kukangama na Klisto. Mu zola yawu, yina kele ya kukangama na Klisto.

<sup>104</sup> Yinga, Marc twadisamaka na Mpeve-Santu, na kusonika Marc 16, ya kieleka.

<sup>105</sup> Jean twadisamaka na ntangu yandi sonikaka Luzabusu. Yandi twadisamaka na Ntwadisi. Yandi vwandaka mpe ya kutwadisama na Ntwadisi na kutuba, “Muntu yina ke katula Ndinga mosi na Yawu, to ke yika diambu mosi na Yawu, yandi yina ke kuzwa ve, ndambu ya yandi, na Buku ya Luzingu.”

<sup>106</sup> Ntangu yayi, wapi mutindu beno lendaka yingisa kima mosi na Ndinga ya Nzambi, mpe kulandila kutuba ti Mpeve-Santu kele na kutwadisa beno? Ya ke simba ve, ya lenda? Ve, tata. Ya lenda ve.

<sup>107</sup> Yandi vwandaka Ntwadisi ya munu na luzingu nionso. Yandi me twadisa munu tii na Luzingu. Yandi kele Yina twadisaka munu na Luzingu, mpe Yandi kele Luzingu ya munu. Kukondwa Yandi mu ke na Luzingu ve. Kukondwa Yandi mu zola kima yankaka ve. Yandi kele Nionso-na-Nionso ya munu. Na bangunga ya munu ya mpasi, Yandi kele pene-pene ya munu. Mazono Yandi sakumunaka munu, bubu yayi bawu ke sala mutindu mosi. Yinki mu lenda vingila? Kima mutindu mosi ntangu nionso, nkembo na Nkumbu ya Yandi! Amen. Yinga, Tata. Yandi silaka yawu. Yandi ke sala yawu. Yandi kele Luzingu ya munu, Yandi kele Ntwadisi ya munu, Nionso-na-Nionso. Mu tulaka kivuvu na Yandi. Mu kuzwaka mwa bakumekama ya ngolo. Mu ke na kivuvu na Yandi kisika nionso mu ke kwenda. Mu zola ti beno sala mutindu mosi. Kana beno kwenda na kusukula, beno bakento, beno tula kivuvu na Yandi. Kana beno kwenda na kati-kati ya mbanza, beno sala kivuvu na Yandi.

108 Mbala mosi mu banzaka ti mu zaba mingi mfinda, beno zaba, samu ti mu zombaka mingi. Mu banzaka, “Mu kele ya kukubama na nionso, muntu ve lenda. . . Beno lendaka ve kuzimbisa munu. Mama ya munu vwandaka na lweka mosi mu-Indien, mpe mu ke zolaka yawu. Oh, la la! Beno lendaka ve kuzimbisa munu na kati ya mfinda, mu zaba kisika yina mu kele.”

109 Mpe samu na nzietelo ya munu ya bankwelani ya malu-malu, mu vunaka fioti kento ya munu, mu tubaka na yandi, “Nge zaba, cherie, ya ke vwanda mbote samu na beto na kukwelana na kilumbu ya makumi zole na tatu ya Ngonda ya kumi.” Ya kieleka, ya kele na ntangu yina Mfumu tubilaka munu na kusala yawu.

110 Mpe mu banzaka, “Ntangu yayi, samu na nzietelo ya bankwelani ya malu-malu, mu bumbaka mbongo, mpe mu nataka yandi tala Niagara Falls, mpe kukwenda na Adirondack na kuzomba fioti.” Beno me mona? Na yina mu nataka yandi na Billy, yandi vwandaka ntete mwana ya fioti. Mpe na yina mu zolaka kunata yandi samu na nzietelo ya bankwelani ya malu-malu, mpe yina vwandaka nzietelo ya kuzomba, mpe, beno zaba. Na yina—na yina mu banzaka ti yina vwandaka kima ya mbote na kusala. Mpe na yina mu nataka yandi kuna, mpe. . .

111 Mu sonikaka na Tata Denton, mukengi ya mfinda. Mpe beto vwandaka kwenda kuna na Mongo Hurricane. Mpe mu tubaka, “Tata Denton, mu ke kwisa kuna, mu zola kuzomba mwa ulusu na nge na automne yayi.”

112 Mpe yandi tubaka, “Mbote, Billy, kwisa awa.” Na yina yandi tubaka, “Mu ke vwanda kuna na kilumbu *kapanda*.” Mbote, kento ya munu mpe munu mosi kumaka kuna kilumbu mosi na ntuala, na Billy, mpe kuna mwa yinzo ya mfinda vwandaka ya kukangama. Ya vwandaka na mwa muludi mosi ntama kuna na mfinda.

113 Kisika, Mpangi Fred Sothmann mpe munu kwendaka ntama mingi ve mpe beto telamaka kuna. Mpeve-Santu, mu monaka Yandi ya kutelema kuna, Nsemo yina ya jaune vwandaka tambula na mulaka, mpe Fred vwandaka ya kutelama kuna. Yandi tubaka, “Kwenda na lweka, Mu zola zonza na nge. Mbasi,” yandi tubaka, “sala keba, ba me lebika nge mutambu.” Yandi tubaka, “Vwanda na nkebolo!” Ya ke kieleka, Mpangi Fred? Mpe mu kwendaka mpe tubilaka yawu na bankama ya bantu na nkokila yina, kuna na Vermont, mu tubaka, “Ya kele na mutambu ba me lebika samu na munu; mu ke tala yinki yawu kele. Mu zaba ve kisika yina ya ke vwanda.” Mpe kaka mbasi-mbasi na nkokila, tala yawu yayi, kuna yawu me salama. Yandi tubaka, “Yawu yayi mutambu yina bawu lebigaka.” Yinga, tata. Kasi Mpeve-Santu twadisaka munu yinki ya kusala. Mpe, oh, la la, ya kieleka yawu yina! Oh, mingi kati ya beno zaba yinki ya vwandaka. Mu kele na ntangu mingi ve ya kuzonzila yawu.

<sup>114</sup> Kasi na kuvwanda kuna na kisika yina na ntangu yina, mbala mosi yawu bandaka na kusala madidi kilumbu yango. Tata Denton vwandaka kwisa kuna na kilumbu yina vwandaka landila, mu tubaka, “Nge zaba, cherie, ya ke vwanda mbote kana mu lendaka kuzwa nkabi ya bakala ya nene na kunata na yinzo.” Mu tubaka, “Beto. . . mu salaka nionso na kubumba mbongo, mpe beto me kwelana ntama mingi ve.” Mpe mu tubaka, “Beto ke kuzwa mbisi ya beto ya nsungi ya hiver kana mu ke zomba fioti bubu yayi.”

<sup>115</sup> Mpe yandi tubaka, “Mbote, kwenda, Billy.” Yandi tubaka, “Ntangu yayi, bambuka moyo ti, ata mbala mosi ve mu me vwandaka na mfinda yayi,” yandi tubaka. Yandi vwandaka na ba-mile makumi zole na tanu [40 kilometres] kuna na zulu ya bamongo, beno zaba, mpe yandi tubaka, “Mu zaba kima mosi ve na yina me tadila yayi.” Mpe yandi tubaka, “Na yina mu ke. . .”

<sup>116</sup> Mu tubaka, “Mbote, ntangu yayi, bambuka moyo, na bamvula zole me luta mu kufwaka baulusu tatu. Yina vwandaka kaka kuna na lweka yankaka ya mongo yina.” Mpe mu tubaka, “Ntangu yayi, mu ke kuzwa nkabi ya nene mpe beto ke kuzwa ulusu mosi,” mpe mu tubaka, “beto ke kuzwa mbisi ya beto ya nsungi ya hiver.” Mbote, yina kele mbote mingi na kuwa, beno zaba. (Mpe beto bukaka bambuma ya mûre, mpe bakaka makala samu na nsungi yina—samu na nsungi yina ya hiver; mpe kuna Billy vwandaka tekisa yawu, mpe Meda na munu vwandaka buka yawu na nkokila na manima ya kisalu ya munu.) Na yina kuna mu—mu tubaka, “Mbote, mu ke baka munduki ya munu, mu ke kulumuka awa.” Mu tubaka, “Ya kele na bankabi mingi awa, mu ke kuzwa mosi.” Mpe mu tubaka, “Nge zaba,” mu tubaka, “kuna mu ke bwila yandi.” Mpe mu tubaka, “Beto ke. . . mu ke vutuka na mwa ntangu fioti.”

Yandi tubaka, “Mbote.”

<sup>117</sup> Kuna, na ntangu mu bandaka na kukwenda, ya vwandaka fioti ndombe. Mpe konso muntu yina kele muntu ya New Hampshire, mpe ya kuna na Nouvelle-Angleterre, zaba yinki ya zola tuba na ntangu dibungi ke kulumukaka, to na bisika nionso kuna na bamongo, beno ke zaba ve kisika beno kele. Kaka mutindu yina. Beno lenda ve kutala diboko ya beno na ntwala ya beno. Na yina kuna mu bandaka na kuluta na mwa kisika mosi ba katulaka bayinti, na kutala, mu kulumukaka, mpe sabukaka na lweka yankaka ya nsongi ya mongo mpe mu yulukaka. Mpe mu monaka ngo mosi, beno ke bokilaka yawu mutindu yina awa na lweka yayi ya yinsi. Beto ke bokilaka yawu, na Weste, yingo. Kuna, ba ke bokila yawu, nkosi ya mongo. Nionso yina kele kaka kibulu mosi. Ya kele puma, na kieleka ya ke mutindu yina. Nyawu kaka mosi, yinda keba ve bitambi yivwa [2,75 metres], na kizitu keba ve nkama mosi na makumi tanu, to bankama zole ya ba-livres [68 na 90 kilos]. Yandi me sabuka nzila, mpe mu me

basisa munduki ya munu na nswalu nionso, kasi mbangu mingi ve na kukubula yandi.

<sup>118</sup> Mbote, mu yulukaka mongo ya fioti, na kulandaka yingo yayi, na kutalaka matiti yina yandi ningisaka, beno zaba. Mu vwandaka kuwa yandi. Yandi vwandaka na makulu yiya. Mu zakaba ti yandi vwandaka ve kibulu ya makulu zole, yandi vwandaka na makulu yiya. Mpe mu zabaka ti yandi vwandaka nkabi ve, samu ti nkabi ke dyataka ntoto na ngolo. Mpe yandi vwandaka tambula na malembe nionso, nyawu yayi, beno zaba, mutindu yayi. Mpe ulusu ke futikaka makulu ya yandi ntangu yandi ke tambulaka. Mpe kuna mu zabaka ti ya zolaka vwanda kaka yingo. Mpe yandi vwandaka na manima ya kitini mosi ya yinti ya kubwa mpe mu monaka yandi ve, na mbala mosi talaka yandi, yandi kwendaka.

<sup>119</sup> Mpe mu vwandaka tala wapi mutindu yandi vwandaka ningisa matiti, beno zaba, kuna na zulu ya mongo, mpe na nsi mutindu yayi, mpe mu vwandaka tala ve dituti yina vwandaka kulumuka ntangu nionso, beno zaba, dibungi yina vwandaka kulumuka. Mu kulumukaka na malembe, mu sabukaka dibengi ya nene mpe mu kotaka na mfinda ya ba-Géant, na kulandaka yingo yayi. Mu banzaka, “Mu ke kuzwa yandi na mwa ntangu fioti.” Mu monaka kisika mosi, mpe mu yulukaka na mwa zulu, mpe vwandaka tala bisika nionso mutindu yayi, mpe mu vwandaka losa meso na mbangu, na kutalaka kana mu lenda mona yandi; mu vwandaka kuwa mbote-mbote, mu me bumbama, me bumbama diaka na malembe. Beno lendaka kuwa mukila kusala makelele mingi, na ntwala ya munu, na yina yandi vwandaka basika. Beno me mona, yandi vwandaka bula bayinti kuna na yina mu lendaka ve kulanda nzila ya yandi. Beno me mona, yandi kuzwaka mayele, kwendaka na zulu ya bayinti mpe vwandaka dumuka na yinti mosi na yankaka. Kuna yandi zabaka ti mu lendaka ve kulanda nzila ya yandi. Oh, mu banzaka, “Oh, ya ke sala kima ve!”

<sup>120</sup> Kuna mu bandaka kuvutuka na nzila ya fioti ya kati-kati ya bamongo, mpe mu nukaka nsunga ya ulusu, ulusu ya bakala yina nunaka. Mu banzaka, “Mu ke kuzwa yandi ntangu yayi, mwana-bakala, ya ke mbote!” Mu nukaka diaka nsunga, mpe mu belamaka fioti, mpe mu talaka mbote-mbote bamutindu nionso ya bidimbu mpe bima nionso. Mu lendaka ve kumona kima; mu balukaka samu na kuvutuka, mpe kwendaka na lweka yankaka ya mongo. Mpe kuna mu bandaka kumona, ya vwanda banda kukuma mwa dibungi. Mpe nukaka diaka nsunga, ya vwandaka kisika mosi na mupepe. Mu tubaka, “Ve. Ntangu yayi, yinki me salama, mupepe vwanda kwisa lweka yayi, mpe mu kwisaka. . .Nsunga ya ulusu me katuka awa na lweka yina, mpe na yina mu sabukaka na lweka yayi awa mpe mupepe ke na kukatuka na lweka yayi yankaka. Na yina ya fwanaka mu

vutuka kisika yina mu kuwaka nsunga ya ulusu na mbala ya ntete, mpe kubanda kuna.”

<sup>121</sup> Mpe na nzila ya munu na kuvutuka, mu talaka na lweka yankaka ya nzila ya kati-kati ya bamongo, mu monaka matiti kuningana. Mpe na ntangu yina kaka, kima mosi ya ndombe lutaka. Mu banzaka, “Tala yandi yayi.” Mu tulaka disasi na munduki, na nswalu nionso, mpe telamaka swi. Mpe, kuna, ya vwandaka nkabi mosi ya bakala ya nene, ya kulutila nene. Mu banzaka, “Ya kele yina mu vwandaka sosa, na kutala.” Mu bulaka nkabi yango ya bakala.

<sup>122</sup> Mu banzaka, “Mbote!” Ata mbala mosi ve mu monaka ti ya vwandaka mutindu . . . Ntangu mu manisaka na kukubika yawu, mu talaka . . . Mu sukulaka maboko ya munu mpe kusunaka mbele ya munu, tulaka yawu na manima. Mpe mu banzaka, “Nkembo na Nzambi! Matondo na Nge, Mfumu Yesu, Nge pesaka munu mbisi ya nsungi ya hiver. Nkembo vutuka na Nzambi!” Mpe mu bakaka munduki ya munu. Mu banzaka, “Mu ke vutuka na nswalu nionso awa na ntangu yayi na nzila ya kati-kati ya bamongo.” Mu tubaka, “Tala awa, mwana, kitembo ke kwisa. Mu ke sala mbote na kukatuka awa mpe kuvutuka na Meda mpe na bayankaka.” Mu tubaka, “Mu fwana sala nswalu.”

<sup>123</sup> Mu lutaka na nzila ya kati-kati ya bamongo, mu fungulaka babuto ya kazaka ya munu ya nene ya mbwaki, mpe mu vwanda kwenda nswalu na nzila ya kati-kati ya bamongo mutindu *yayi*, na kubalukaka. Kima ya ntete beno zaba, mu banzaka, “Oh, wapi kisika mu me baluka?” Mupepe vwandaka kuma ngolo, bayinti vwandaka vukana. Mu banzaka, “Wapi kisika mu me baluka?” Mu vwanda zungudila. Mu—mu zabaka ti mu vwanda kwenda na nswalu nionso na Mongo Hurricane. Kasi mbala mosi mu sikamaka, mpe mu bandaka kutukuta, mu banzaka, “Wapi diambu awa? Mu kwendaka ya me kuma ndambu mosi, to ngunga tatu na zulu ya yiya, mpe mu lendaka ve na kuzwa kisika yina mu balukaka.” Mu talaka na zulu, mpe nkabi ya munu vwandaka kuna. Mu vwandaka kaka na kisika mosi. Mu banzaka, “Mbote, yinki mu me sala?”

<sup>124</sup> Mbote, mu me vutuka diaka. Mu me banza, “Mbala yayi mu lenda, mu vwanda mona mbote ve.” Mu talaka konso mwa kuningana na bisika nionso, mu talaka. Mu landilaka na kusosa, na kusosa, na kusosa. Na matuti yina vwandaka kwisa, mu zabaka ti kitembo ya mvula ya mpembe vwandaka na nzila, lubungi vwanda mingi ve, mpe kuna mu bandaka kumona. Mu banzaka, “Mu ke kwenda mwa ntama mingi,” mu kwendaka, mu kwendaka, mu kwendaka, mu kwendaka, mu kwendaka, mu kwendaka. Mpe mu banza, “Mbote, yayi kele ngitukulu, ya kele mutindu ti mu monaka kisika yayi.” Mpe mu talaka, mpe kuna na zulu vwandaka nkabi ya munu. Beno me mona?

125 Beno zaba yinki mu vwanda sala? Ba-indien ke bokilaka yawu “kutambula ya lufwa.” Beno me mona, beno ke tambula na kusalaka kingolo-ngolo, kubaluka mpe kubaluka. Mbote, mu banzaka ti mu vwandaka ntwadisi mosi ya mbote mingi ti ata mbala mosi ve mu lendaka zimbana. Beno me mona, ba lenda ve kutubila munu na yina me tadila mfinda, mu zabaka nzila ya munu. Beno me mona?

126 Mpe mu bandilaka diaka. Mu tubaka, “Mu lenda sala kifu yayi ve.” Mpe mu vutukaka diaka.

127 Mu tambulaka ndambu na nzila ya kati-kati ya bamongo, kuna mupepe bandaka na kubula. Oh, la la! mvula-mpembe bisika nionso! Ya kumaka mutindu mpimpa. Mpe mu zabaka ti Meda lendaka kufwa na mpimpa yina na mfinda, yandi zabaka ve wapi mutindu ya kukikeba yandi mosi. Mpe Billy vwandaka kaka keba ve na bamvula yiya, bamvula tatu, kaka mwa mwana. Mpe mu banzaka, “Yinki ba ke sala?” Mbote, mu yulukaka kisika mosi mpe mu dyataka kisika ya mafulu, mu banzaka, “Mu kele na kisika mosi ya bamongo ve, mpe mu lenda ve kumona kima, lubungi kele bisika nionso.” Mu vwanda kwenda na kubalukaka na ntangu yina.

128 Na kutala, mu zolaka kuzwa kisika mosi mpe kuingila, kana mu vwandaka na muntu. Mu zola sikama mpe kuingila tii kitembo zolaka luta, kilumbu mosi to zole, mpe kubasika. Mu zolaka zenga kitini ya munu ya nkabi . . . kuna na manima ya munu, mpe kukota kuna, kudia, mpe kuzimbana yina. Kasi beno lenda sala mutindu yina ve, na yina kento ya beno mpe mwana kele kuna na kati ya mfinda, kele na kufwaka. Beno me mona?

129 Kuna mu bandaka na kuyindula, “Yinki mu lenda sala?” Na yina mu kwendaka mwa ntama. Mpe mu banzaka, “Ntangu yayi, vingila. Na ntangu mu sabukaka dibengi ya ntete yina, mupepe vwandaka na ntwala ya munu, na yina ya lenda vwanda ti mu me kwizila na lweka yayi. Ya lenda vwanda ti mu kwisa na lweka yayi.” Mu yenga-yengaka na kati ya mfinda ya ba-Géant, kasi mu zabaka ve kisika yina mu vwandaka. Mu tubaka, “Oh!” Mu bandaka na kudasuka. Mpe mu banzaka, “Vingila mwa minuti, Bill, nge me zimbana ve,” na kumeka kuvuna munu. Nge lenda vuna ve. Ve, ve. Ndinga yina kele na kati ke tubila beno ti beno ke sala yimbi.

130 Oh, beno—beno ke meka kutuba, “Oh, mu me vulukaka, mu ke kwendaka na yinzo-Nzambi.” Beno kukimonisa mpasi ve, beno vingila tii beno ke kuma na mbeto ya lufwa, mpe beno ke zaba ti ya ke mutindu yankaka. Ndinga yina kele na kati ya ntima ya beno ke tubila beno. Kima mosi na kati ya beno ke tubila beno ti beno me sala yimbi. Beno me mona? Beno zaba ti kana beno kufwa beno ke kutana ve na Nzambi ya santu. Mutindu beto zonzilaka na Yandi mazono na nokila, ata Bawanzio ya santu fwana bumba bilungi ya bawu

samu na kutelama na ntwala ya Yandi. Wapi mutindu beno lendaka telama kuna kukondwa Menga ya Yesu Klisto samu na kubumba beno?

<sup>131</sup> Mu banzaka, “Oh, mu lenda.” Mu me banda na kukwenda. Mpe mu me bambuka moyo ti mu vwandaka kuwa Kima mosi. Kuna mu dasukaka. Mpe mu banzaka, “Awa, kana mu sala yina, mu ke zaba diaka ve yinki ya kusala.” Yayi kele mutindu yina muntu ya kuzimbana ke salaka, yandi ke zaba diaka ve yinki ya kusala na mfinda. Kuna yandi ke baka munduki ya yandi, kukibula munduki yandi mosi; to kubwa na kati ya dibulu mosi mpe kuzengana dikulu, mpe yandi ke vwanda kuna, yandi ke fwa kuna. Na yina, mu banzaka, “Yinki mu ke sala?” Kuna mu bandaka na kutambula.

<sup>132</sup> Mpe munu waka Kima mosi yina vwandaka landila na kutuba, “Mu kele Lusalusu ya kieleka na ntangu ya mpasi.” Mu fulaka kaka na kutambula.

<sup>133</sup> Mu banzaka, “Awa, mu zaba ti mu ke na kukumaka mwa kilawu na ntangu yayi, mu ke na kuwa Ndinga ke zonga na munu.” Mu fulaka na kukwenda. Mu kwendaka, “*hhhu, hhhhu, hhhhu*,” na kusika mwita, beno zaba. Mu banzaka, “Awa, mu me zimbana ve. Nge zaba kisika yina nge kele, mwana! Wapi diambu ya nge? Nge lenda zimbana ve. Nge ke—nge ke muzombi ya mbote mingi, nge lenda zimbana ve.” Mu vwandaka kukikembisa munu mosi, beno zaba, kuvunama munu mosi samu na kuzimbana yawu.

<sup>134</sup> Beno lenda vuna yawu ve. Kuna na nsi *awa* ya ke na mwa mufumba mosi yina kele na kubaluka, na kutubaka, “Mwana, nge me zimbana mpe nge zaba ti ya ke mutindu yina. Beno me mona, nge me zimbana.”

<sup>135</sup> Mu fulaka kaka na kukwenda. “Oh, mu me zimbana ve! Nionso ke vwanda mbote. Mu ke kuzwa nzila ya munu ya kubasika.” Bima me banda kukuma ya ngitukulu, mipepe me kuma pene-pene. Mvula ya mpembe bandaka kubwa, mvula ya mpembe ya fioti, beto ke bokilaka yawu “mvula ya matadi.” Mu banzaka, “Kento na mwana! Mu kele ve. . .” Mu banzaka, “Oh, la la!”

<sup>136</sup> Na mbala mosi mu waka Yawu diaka, kutuba, “Mu kele Lusalusu na ntangu ya mpasi.” Mpe kuna mu vwandaka musadi ya Nsangu ya mbote, yina vwandaka longa awa na tabernacle.

<sup>137</sup> Na yina mu banzaka, “Mbote, yinki mu lenda sala?” Mu telamaka, mu talaka bisika nionso, mpe kuna lubungi vwandaka me kubwa yimeni na ntangu yina. Mu. . . Yawu yayi. Ata kima mosi ve lendaka salama kuna. Mu banzaka, “Oh, yinki mu lenda sala?” Mu banzaka, “Tata, mu ke ya kulunga ve samu na kuzinga, mu tulaka kivuvu mingi na munu mosi. Mu banzaka ti mu vwandaka muzombi, kasi mu ke mutindu yina ve yawu.”



138 Mpe, mpangi, mu ke vwandaka konso ntangu na kivuvu na Yandi. Na kubula munduki, mu kuzwaka bimbangi yina kele ya kukangisa kuna. Mpe mutindu mulobi-mbisi, mu zaba kima ve, kasi mu ke na kivuvu na Yandi konso ntangu. Na kubula munduki, mu zaba kubula munduki mbote ve, kasi Yandi me bika munu kuzwa misendo na yinza samu na yawu. Beno me mona? Kubula nkabi mosi, na bitamina sambwadi, to nana [640 to 730 metres]. Mu kele na munduki ya kukangisa kuna yina mu kufwaka bibulu makumi tatu na tanu kukondwa mosi ya bawu. Beno tanga yawu mwa kisika mosi, kana beno lenda. Beno me mona? Munu ve, ya ke Yandi. Mu tulaka kivuvu na Yandi.

Kuna mu vwandaka, mu banzaka, “Yinki mu lenda sala? Yinki mu lenda sala?”

139 Mu me landila... Ya vwanda pusana, pusana, “Mu ke Lusalusu ya kieleka na ntangu ya mpasi, Lusalusu ya kieleka.”

140 Mu banzaka, “Yina kele na kuzonza kele Nzambi?” Mu katulaka yimpu ya munu. Mu vwandaka na yimpu ya munu ya kisalu, na muswale ya mbwaki ya kukanga na yawu. Mu kitisaka yawu. Mu katulaka kazaka ya munu, ya vwandaka ya kupola. Mpe mu kitisaka kazaka ya munu, mu telemisaka munduki ya munu pene-pene ya yinti. Mu tubaka, “Tata ya Mazulu, na ntangu yayi mu me kuma mutindu kilawu, mu ke na kuwa Ndinga mosi zonza na munu. Yina kele Nge?” Mu tubaka, “Mfumu, mu ke tuba na Nge ti mu ke muzombi ve. Mu kele yawu ve, mu—mu lenda ve kuzwa nzila ya munu. Nge fwana sadisa munu. Mu kele ya kulunga ve na kuzinga, na kutala bima yina mu me sala, na kukwisaka awa mpe kubanzaka ti mu zaba ya kulutila mingi samu na yawu ti ata mbala mosi ve mu lenda zimbana. Mu ke na nsatu ya Nge, Mfumu. Kento ya munu kele kento mosi ya mbote. Mwana ya munu ya fioti, mwa mwana ya munu ya bakala, mama ya yandi me kufwaka, mpe yandi ke na kumeka na kuvwanda mama samu na yandi, mpe mu me kwela yandi ntama mingi ve. Mpe yandi yayi awa, mwana, kuna na kati ya mfinda, bawu zole ke kufwa na mpimpa yayi. Mupepe yayi, mbala yankaka madidi ke kulumuka na degré kumi na nsi ya zéro, mpe ba ke zaba ve wapi mutindu ya kuzinga. Bawu ke kufwa na mpimpa yayi. Kubika bawu kufwa ve, Nzambi. Nata munu pene-pene ya bawu, samu mu kengila bawu samu bawu kufwa ve. Mu me zimbana! Mu me zimbana, Nzambi! Mu—mu ke na kulenda ve na kuzwa nzila ya munu. Nge lenda ve kusadisa munu lemvo ya Nge? Mpe lemvokila, munu samu na munimi ya munu! Mu lenda ve kusala kima kukondwa Nge, Nge kele Ntwadisi ya munu. Nge sadisa munu, Mfumu.”

141 Mu telamaka, mpe mu tubaka, “Amen.” Mu lokotaka muswale ya munu; kazaka ya munu, me lokota yawu; me lwata yimpu ya munu; me baka munduki ya munu. Mu me tuba, “Ntangu yayi mu ke baka lweka yina mu zaba na yina me tadila munu kele ya mbote, yina kele mbote landila dibanza ya munu;

mpe mu ke kwenda na ntwala na lweka mosi, samu ti mu ke na kutambulaka na kubalukaka kisika mosi, mu zaba ve wapi kisika. Kasi mu ke baka lweka yina Nge ke tubila munu, Mfumu Nzambi, Ntwadisi ya munu.”

<sup>142</sup> Mu bandaka na kutambula lweka *yayi*. Mu tubaka, “Yayi kele yawu, mpe mu fwana kusala ti munu mosi kukwikila yawu. Mu ke kwenda lweka *yayi*. Mu ke kwenda na ntwala lweka *yayi*. Mu ke soba ve, mu ke kwenda lweka *yayi*. Mu zaba ti dibanza ya munu kele mbote. Mu ke kwenda lweka *yayi*.” Kana mu kwendaka lweka *yayi*, mu zolaka kuma na Canada. Beno me mona?

<sup>143</sup> Kaka kuna mu waka Kima mosi kusimba munu na dipeka, diboko mosi, ya vwandaka mutindu diboko ya muntu, na yina, na mbala mosi mu balukaka na kutala. Ya vwandaka na muntu ve ya kutelama kuna. Mu banzaka, “Yina vwandaka yinki?” Biblia kele awa na ntwala ya munu. Nzambi, Ntwadisi ya munu mpe Zuzi, kele ya kutelama awa. Mu talaka na zulu. Mpe kuna na manima na lweka *yayi*, lubungi yango me katuka kwandi na mutindu ti mu lendaka mona yinzo ya yinda na zulu ya Mongo Hurricane. Mu kwendaka na lweka yankaka ya yawu, na kulandaka biyeka ya munu ya kuzomba, mu vwandaka kwenda lweka ya yawu yankaka, ya vwandaka me kuma mpimpa mingi na nkokila yina. Mu balukaka na nswalu nionso, na kukwendaka mutindu *yayi*. Mu simbaka yimpu ya munu mpe mu nangunaka maboko ya munu na zulu, mu me tuba, “Twadisa munu tii kuna, Nzambi, Nge kele Ntwadisi ya munu.”

<sup>144</sup> Mu bandaka kutambula. Ya lombaka ti mu yuluka na ngolo nionso bamongo mpe nionso samu na kukuma kuna, mpimpa vwandaka lutila mpe kulutula. Kuna ya kumaka ndombe. Bankabi vwanda dumuka na ntwala ya munu, mpe nionso. Mu lendaka banza kima yankaka ve kana ya kukangama na lweka mosi kaka, na kuyuluka na mongo *yayi*.

<sup>145</sup> Mpe mu zaba ti kana mu lendaka kuma na yinzo ya yinda, Tata Denton mpe munu . . . na printemps yina mu sadisaka yandi na kutula nsinga na zulu. Beto nataka nsinga ya allo-allo katuka Mongo Hurricane, tii na nsi na bitamina keba ve tatu na ndambu to yiya ya ba-mile [9, 5 kilometres], tii na camp. Mpe ya vwanda landila na mwa nzila mosi ya fioti, kasi, na mvula-mpembe kuna, beno lendaka ve kutala mwa nzila yango. Beno me mona? Na mupepe yina vwandaka bula mpe nionso yina, mpimpa vwandaka mingi na mupepe ya ngolo ya mvula-mpembe, mpe nionso yina vwanda salama, beno lenda zaba ve kisika beno kele. Mbote, kima kaka mosi yina mu zabaka kusala, na yina ya kumaka ndombe, mpe mu zabaka ve . . . mu zabaka ti mu vwanda kwenda na lweka mosi, na ntwala kuna ya mongo. Samu ti mu fwanaka kukwenda na zulu ya mongo, mpe yinzo ya yinda vwandaka na zulu ya mongo, mpe mu vwandaka na bitambi keba ve mafunda sambanu ya ba-mile [9,5 kilometres] na kukuma

kuna. Beno banza fioti, lubungi yina katukaka, mafunda ya bitambi sambanu ya ba-mile [9,5 kilometres], kaka mwa dibulu, samu mu mona yawu!

<sup>146</sup> Mpe kuna mu—mu bakaka munduki ya munu na diboko *yayi*, mpe mu telemisaka diboko *yayi* na zulu, samu mu kangaka nsinga na zulu ya bayinti mutindu yina na kukulumunaka, bansinga ya allo-allo tii na tenta, samu yandi solula na kento ya yandi, mpe kubokila kuna, na zulu ya mongo. Mpe mu vwanda sadisa yandi na kukatula yawu na automne yina. Mpe mu vwanda na diboko ya munu kuna na zulu mutindu *yayi*, na kutubaka, “O Nzambi, bika munu simba nsinga yina.” Mu vwanda tambula, mpe diboko ya munu vwandaka sala munu mpasi mingi, ya lembaka, mu vwanda tala mpasi mingi na kutelemisa yawu, mpe mu fwanaka kaka kukulumuna yawu. Mpe mu vwanda yingisa munduki mpe kusimba yawu na *yankaka*; mu vwanda vutuka fioti na manima samu mu zimbana yawu ve ya kieleka, na yina mu vwanda nangula diboko ya munu, kubanda kutambula, kutambula. Ntangu vwanda me kuma ntama, mpimpa kumaka, mupepe vwandaka fula. Oh, mu vwanda simba kintala mosi, mu vwanda tuba, “Ya kele yawu! Ve, ya kele yawu ve.” Oh, ya vwanda pesa . . . Beno bika ve yawu kupesa makelele ya yimbi.

<sup>147</sup> Na manima ya mwa ntangu fioti, na ntangu mu kumaka pene-pene ya kubika, diboko ya munu tutaka kima mosi. Oh, la la! Mu vwanda mona diaka, munu yina vwandaka ya kuzimbana. Mu simbaka nsinga yina. Mu bwisaka munduki na ntoto, mu katulaka yimpu ya munu na yintu, mpe mu me telema kuna. Mu me tuba, “O Nzambi, wapi mbote ya lenda sala na muntu yina zimbana, kana yandi me talana.” Mu me tuba, “Katuka awa tii kuna na nsi ya nsinga yayi, mu ke bika yawu ata mbala mosi ve. Mu ke kangama na nsinga yayi. Ya ke twadisa munu tii na kisika yina kele nionso yina mu lutila zola na ntoto yayi, kuna. Kento ya munu mpe mwana ya fioti, kele na boma mingi, bawu zaba ve kisika yina mu kele, bawu zaba ve wapi mutindu kupelisa tiya, ba zaba ve yinki ya kusala, mpe mipepe ke fula, mpe bintala ke zengana mpe ke bwaka na bayinti.” Ata mbala mosi ve mu zolaka bika nsinga yina. Mu kangamaka na nsinga yina tii ya twadisaka munu kuna na kisika yina vwandaka nionso yina mu lutila kuzola na ntoto.

<sup>148</sup> Ya vwanda kimbangi mosi ya boma, mpe kimbangi mosi ya lukumu samu na kumona diaka nzila ya munu, kasi ya kele kaka yina ve. Kilumbu mosi mu vwanda ya kuzimbana na kati ya disumu. Mu vwanda kwenda dibuundu na dibuundu, na kumeka kuzwa Kima mosi. Mu me kwenda na ba-Adventiste ya du Septième jour, ba me zonza na munu, “Landa Saba, bika kudia musuni.” Mu me kwenda na dibuundu ya Baptiste, na dibuundu ya ntete ya Baptiste, yandi me tuba, “Telema kaka mpe zonza na bawu ti nge me kwikila Yesu Klisto Mwana ya

Nzambi, mpe mu ke botika nge, kaka yina.” Kima vwandaka ve. Kasi kilumbu mosi, kuna na mwa musampa mosi ya makala, mu me nangulaka maboko na zulu, mu bakisaka Kima mosi; to, mu lenda tuba, Kima mosi simbaka munu. Ya vwandaka Nsinga ya luzingu, Ntwadisi. Mpe Yandi me twadisa munu tii awa na lukengolo, mu lenda ve kukatula diboko ya munu na Nsinga yayi. Mu me telemisa maboko ya munu na Yandi. Bika ba credo, ba denomination kusala nionso yina ba zola, mu me kangama na Ntwadisi. Ata nionso yina me vwanda na ntoto mpe nionso yina kele na Mazulu, yayi vwandaka mbote ve samu na munu, yawu kele na nsuka ya Nsinga yayi. Yandi me nata munu na lukengolo tii awa, mu ke vwanda na kivuvu na Yandi na nzila yina me bikana. “Ntangu Yandi Mpeve-Santu ke kwisa, Yandi ke twadisa beno mpe ke twadisa beno na nionso . . .”

<sup>149</sup> Bampangi, Ya me nata munu kisika yina mu kele bubu yayi. Ya me kumisa munu yina mu kele. Mu kele na kiese na kulakisa Yawu na beno. Ya kele Ntwadisi yina kaka mu zaba, awa na ntoto to Kuna na zulu. Yandi ke Ntwadisi ya munu na ntangu mu ke kwendaka na kuzomba. Yandi ke Ntwadisi ya munu na ntangu mu ke kwendaka na kuloba. Yandi ke Ntwadisi ya munu ntangu mu ke zonzaka na muntu. Yandi ke Ntwadisi ya munu na ntangu mu ke longaka. Yandi ke Ntwadisi ya munu na ntangu mu ke lalaka.

<sup>150</sup> Mpe na ntangu mu ke fwa, Yandi ke vwanda ya kutelama na nzadi. Yandi ke twadisa munu na kusabuka na lweka yankaka. “Mu ke na boma ve, samu ti Nge kele na munu. Yinti ya Nge ya nsongi ya kisengo mpe yinti ya Nge, bawu ke sungika munu mpe ke twadisa munu tii na lweka yankaka ya nzadi.”

Beto sambila.

<sup>151</sup> Tata ya Mazulu, mu ke na kuvutula matondo mingi samu na Ntwadisi, Yandi Yina ke twadisaka munu. Oh, bantangu yankaka, Tata, mu ke kuwaka Yandi ve pene-pene ya munu, mu ke kumaka na boma. Mu zola Yandi pene-pene ya munu samu ti mu zaba ve na wapi ntangu mu ke kuma na nzadi. Mu zola Yandi kuvwanda pene-pene ya munu. Kubika munu ata mbala mosi, Mfumu. Mu lenda kuzonza ve, mu lenda kulonga ve, mu lenda kuzomba na mfinda ve, mu lenda kuloba ve na simu, mu lenda kunata ve tomabilu ya munu, ya kele na kima mosi ve yina mu lenda sala kukondwa Nge. Nge kele Ntwadisi ya munu. Mutindu kiese kele na munu na kutubila na kimvuka yayi na nkokila yayi, mutindu Nge me twadisa munu na kati ya bima nionso yayi, mutindu Nge me nata munu!

<sup>152</sup> Mu vwanda banza kilumbu yankaka yina; bamvula fioti yina me luta, mu vwanda ya kutelama awa na bala-bala, mpe samu ti dikanda ya munu salaka yimbi, muntu ve lendaka zonza na munu. Mu vwanda munu mosi kukondwa kuzinga kintwadi na bampangi. Ata muntu zolaka kusala kima na munu.

Ba vwanda tuba, “Tata ya yandi kele muteki malafu mayuya.” Mpe, Mfumu, ata muntu zolaka kuzonza na munu. Mpe mu zola bantu. Kasi kilumbu mosi na ntangu mu simbaka Nsinga yango! Awa mu banza, Mfumu, mu fwana zimbana na mbala mosi mpe kukwenda na mfinda samu na kupema fioti. Yinki me sala yawu? Kimuntu ve, malongi ya lukolo ve; mu kele ve na yawu. Kasi ya vwanda Nge, Mfumu. Nge, Mfumu. Nge me nata munu kukubula na kati-kati ya cible, Nge salaka munu kuzwa mbisi ya nene, samu Nge zabaka ti mu zolaka kusala yawu. Nge me pesa munu batata na bamama. Nge me pesa munu bampangi ya babakala mpe bampangi ya bakento. Nge me pesa munu mavimpi ya mbote. Nge me pesa munu kento. Nge me pesa munu dikanda. Nge kele Ntwadisi ya munu, Mfumu. Bika munu kusimba diboko ya Nge, kubika munu ve ata mbala mosi kubika yawu. Kana diboko mosi me lemba, mu ke yingisa diboko. Sadisa munu, Mfumu.

<sup>153</sup> Mpe bika ti na ntangu yayi mosi na mosi kusimba Nsinga yayi ya luzingu, Mfumu, Mpeve-Santu yina kele Luzingu ya beto, yinto ya Luzingu. Mpe bika Yawu twadisa beto nionso na Yinsi yina ya kiese, kisika yina bampasi ya luzingu ke manisa mpe kisalu ya beto na ntoto ke manisa, mpe kuna buboba ke vwanda ata mbala mosi ve, ata muntu ya kulemba ve, ata mbala mosi ve bampimpa ya mpasi, ata mbala mosi ve kudila mpe kusambila, ata mbala mosi ve kubokila na chair, kasi beto ke vwanda ntangu nionso bantwenia kuna, kubela mpe mawa ke vwanda ata mbala mosi ve. Disumu ke vwanda diaka ve, mpe beto ke zinga na kati ya ludedomo ya Nzambi samu na bambandu nionso, na Kisika ke na nsuka ve. Pesa yawu, Mfumu.

<sup>154</sup> Mpe ntangu yayi, Tata, kana ya kele awa na muntu yina na nkokila yayi yina nabunu yandi simba Nsinga yina ya luzingu, bika bawu kubakula Yawu na ntangu yayi. Mpe bika ti Mpeve-Santu Yina twadisaka munu . . . Mpe mu lenda tuba na ntima ya munu nionso, na diboko ya munu na zulu ya Ndinga ya Nge, Yandi ke nungaka konso ntangu. Mu ke salaka bakyeta mbala mingi. Kasi Yandi ke nungaka. Bika Yandi kuvwanda na munu, Mfumu. Bika munu kuvwanda na Yandi. Mpe bika ti bayankaka yina kele awa, bayina zaba Yandi ve na nkokila yayi, bika bawu kusimba diboko ya Yandi yina ke sobaka ve, samu na kuvwanda na nsi ya lutwadusu.

<sup>155</sup> Mpe kilumbu mosi beto ke kuma na nzadi. Ya ke vwanda na lubungi na suka yango, mpe. Nzadi ke sala makelele ya ngolo, Jourdain ya nkulu, bimpo ke bula na ngolo, lufwa ke kangisa luzingu yina kele na kati ya beto. Kasi, Nzambi, mu—mu ke vwanda ve na boma. Mu bongisaka yawu ntama mingi. Mu zola kaka kukatula yimpu, mutindu kinwani, kubaluka, kutala nzila nionso kumona kisika yina Nsinga yango me twadisa munu. Kumona bisika nionso ya kuyuma yina mu me lutila, mpe konso kisika ya bansende, mpe kisika nionso ya matadi yina mu tutaka,

kasi mu simbaka Nsinga yango. Mutindu Nge tubaka, musoniki tubaka yawu:

Ba yankaka ke lutila na bamasu, mpe ba  
yankaka ke lutila na bampasi,  
Ba yankaka ke lutila na bantontolo ya nene,  
kasi beto nionso ke luta na nzila ya Menga.

Mpe mu zola kubaka *Yayi*, Mbele ya yinda yayi awa, yina kebaka munu nzila nionso, mpe kuvutula Yawu na kisika ya Yawu, kuboka, “Tata, tinda bwatu na suka yayi, mu ke na kwisa na Yinzo.” Nge ke vwanda kuna, Mfumu. Nge silaka yawu. Nge lenda kondwa ve.

<sup>156</sup> Sakumuna konso muntu yina kele awa na ntangu yayi. Mpe kana ba zaba ve wapi mutindu ya kusimba Nsinga yango, mpe ata mbala mosi ve ba me simbaka Yawu, bika maboko ya santu kutelema na ntangu yayi, maboko yina zola, maboko yina kele na nsatu, mpe kusimba Nsinga ya luzingu yina ke twadisa bawu na yina bantima ya bawu ke na yawu nsatu, ngemba ya kulunga mpe ya kuyangidika, kupema na Klisto.

<sup>157</sup> Na bayintu ya beto ya kukulumusa, ya kele na maboko yina zola kutelema mpe kutuba, “Bika yawu vwanda munu. Simba diboko ya munu”? Oh, Nzambi sakumuna beno.

Na ntangu nzila ke kuma na manyongo, Mfumu  
ya mfunu, vwanda pene-pene,  
Na ntangu luzingu zola katuka na munu;  
Mu ke telema na simu ya nzadi,  
Twadisa makulu ya munu, simba diboko ya  
munu,  
Baka diboko ya munu, Mfumu ya mfunu,  
twadisa munu tii na suka.

<sup>158</sup> Ya lenda vwanda na yankaka yina ke telemisa diboko, kutuba, “Mfumu, mu zola kusimba Nsinga ya luzingu na nkokila yayi. Mu zola zaba ti Klisto me lemvo kila masumu ya munu, mpe mu zola kuvwanda kivangu mosi ya malu-malu katuka ntangu yayi”? Nzambi kusakumuna beno. Yankaka lendaka tuba, “Bika munu kusimba Nge, Mfumu. Bika mu zimbana”? Nzambi sakumuna nge, mpangi-kento. “Bika mu zimbana, mpe mu kuma yawu, Mfumu, na kati ya Nge.” Nzambi kusakumuna beno. Mpe Nzambi kusakumuna beno. Ya kele yina. “Bika mu zimbana, Mfumu. Bika mu zimbana.” Nzambi kusakumuna nge, mpangi-bakala. “Bika mu . . .” Nzambi kusakumuna nge, mpangi-kento. “Bika mu zimbana luzabu ya munu nionso.” Nzambi kusakumuna nge, mpangi-kento. Beno sala kivuvu ve na mabanza ya kimuntu. Beno landa Ntwadisi, Yandi ke twadisa beno na Kieleka nionso. “Twadisa munu, Mfumu Yesu, twadisa munu.” Nzambi kusakumuna beno na manima kuna. Oh, maboko mingi me telema, na kusosa mpulusu. Ntangu yayi na yina beto kele . . .

159 Na autel awa, beno lenda sala ve lubokilu na autel, samu bantu kele ya kuvwanda bisika nionso awa. Kasi Yandi kele pene-pene awa. Beno zaba mbote-mbote ti, na ntangu beno me telemisa diboko ya beno, kima me salama na kati ya ntima ya beno. Yesu tubaka, “Muntu yina ke kuwa Bandinga ya Munu mpe ke kwikila na Yandi yina tindaka Munu, ke na Luzingu ya kukonda nsuka.” Ya kele mutindu yina samu na nge? Na yina ya kele na baptistère awa ya kifuluka na masa. Ntangu kele mingi samu na mbotika. Beto sambila.

160 Tata ya beto ya Mazulu, mwa Nsangu yayi ya kidi-kidi na nkokila yayi na nzila ya ndinga ya kukangama, Mpeve-Santu me kwenda kisika mosi. Ya me kwenda kisika yina Ya zolaka kwenda, mpe ya kele na mingi, Mfumu, na nkokila yayi, keba ve kumi na tanu to makumi zole ya maboko yina vwandaka me telema, ti ba kele na nsatu ya Ntwadisi. Ba me bakula ti ba vunamaka. Ba ke na kumeka na kutuba “Nionso kele mbote samu na munu,” kasi na kati ya bantima ya bawu ba zaba ti ya kele luvunu. Mpe ba zola kuwa Nge, Mfumu. Ba ke na nsatu ya Ntwadisi. Ba zola kubanda kosalu. Nge kele na nsuka ve. Ba zola kubanda kosalu ya nzyetolo yayi. Ba zaba ve wapi mutindu ya kukuma kuna. Muntu ve zaba wapi mutindu ya kukumisa bawu kuna; kaka Nge Mosi lenda. Ba me kwisa samu na Ntwadisi yina Nzambi kubikaka, Mpeve-Santu. Ba me telemisa maboko ya bawu.

161 O Mpeve-Santu mpe Ntwadisi, kwisa na zulu ya bawu. Lemvokila konso disumu. Lemvokila masumu ya bawu ya nko. Nata bawu na kati ya Nzutu ya Klisto na nkokila yayi, kisika yina ba lenda kuwa lotiliki ya Nzambi ke lutila na Nsinga yayi ke twadisa bawu tii na Jourdain, mpe na lweka yankaka ya Jourdain tii na Yinsi ya nsilulu. Bika ba landa kaka Ndinga. Ndinga ke tuba, “Beni soba nkadulu, mpe na manima beno botama na Nkumbu ya Yesu Klisto.” Kubika bawu ve kumeka yawu na mutindu yankaka. Bika bawu kulanda kaka Ndinga, samu ti Yandi kele Yina ke twadisa. Yina kele—yina kele bitezo ya kuyuluka tii beto lenda kusimba diboko ya Ntwadisi. Pesa yawu, Mfumu. Bika ba vwanda ya Nge. Ba kele na maboko ya Nge na ntangu yayi, mutindu bankeni, muntu ve lenda katula bawu na ngolo. Mu ke kwikila ti Nge ke baka bawu, mutindu bantu me vuka. Mu me ndima ti bawu me telemisa maboko ya bawu, ba lendaka ve kusala yina na bawu mosi kana Kima zonzila bawu ve. Yina vwandaka Nge, Mpeve-Santu mpe Ntwadisi.

162 Ba ke mona ngunga kubelama na nswalu, lubungi ke na kukulumuka na zulu ya ntoto, binkulu ya nene ya bantu mpe—mpe bima ke na kuvukana kintwadi, mabuundu ke na vukanaka, ke na kukuma kintwadi. Mpe, O Nzambi, wapi mutindu ba lenda meka kutuba, “Nionso yina ke basika na ndonga fwana katuka awa mpe kwenda na Alaska.” Mpe bima nionso yayi yina bawu ke na kuyindulaka, ya kele ya malu-malu ve samu na beto,

Ntwadisi ya nene me lakisa beto yina na nzila ya Ndinga. Beto ke na kulutilaka na nzila Yina.

<sup>163</sup> Tata, Nzambi, Nge me zonza na bawu na nkokila yayi, mpe mu me pesa bawu na Nge na ntangu yayi mutindu bankeni ya Ndinga. Na Nkumbu ya Yesu.

<sup>164</sup> Ntangu yayi, na zulu ya chaire awa, Tata, kele na bamuswale, ya kele ya bantu ya kubela, ya mwa bana ya fioti, keba ve, ya mwa mama, ya mwa mpangi-kento, ya mwa mpangi-bakala; mpe mwa bapengele ya bansuki ya kukangama na yawu. Mpe na ntangu yayi mu me baka mpe kutula yawu pene-pene ya munu. Awa, Biblia ke zonza na beto ti bamuswale mpe binkuti yina simbaka nzutu ya Paul bawu tulaka yawu na bambevo, mpe bambevo belukaka, bampeve ya yimbi vwanda basika na bantu. Awa beto zaba, Mfumu, ti Paul vwandaka muntu, yandi vwandaka kaka muntu. Kasi ya vwandaka ngolo ya Mpeve-Santu yina vwanda na yandi yina vwandaka sakumuna bamuswale, mpe lukwikilu yina bantu vwandaka ti yandi vwandaka ntumwa ya Nge. Ntangu yayi ba me katula beto Paul, kasi Ntwadisi ve, Yandi kele diaka awa. Mpe, Nzambi, mu ke na kusambila ti Nge sakumuna bamuswale yayi, mpe bika ti Ntwadisi kunata bawu tii na kisika yina, ya kukipesa ya muvimba.

<sup>165</sup> Ba me tuba na beto diaka ti ntangu Israël vwandaka landa Ntwadisi ya bawu, mpe bawu kumaka tii na Jourdain, tii (ya kieleka) na Nzadi ya Mbwaki. Bawu telemaka na kati ya kisalu ya bawu, mpe Ntwadisi nataka bawu kuna. Yinki? Na kulakisa nkembo ya Yandi. Mpe ntangu kivuvu nionso vwanda me kwenda, kuna Nzambi vwanda tala na nsi na nzila ya Dituti yango ya Tiya, mpe nzadi monaka boma mpe yandi me funguka, mpe kuna vwandaka na nzila vwanda me funguka samu Israël kutambula na yinsi ya nsilulu.

<sup>166</sup> Ya kieleka, Mfumu, Nge kele kaka Nzambi mosi. Bantu yayi kele keba ve Baklisto, bawu kele keba ve na nzila ya kisalu, kasi ba me nata bawu na kisika yayi ya kukangama kisika bimbevo me kanga bawu. Tala na nsi na nzila ya Menga ya Yesu na nkokila yayi, ti mpeve ya yimbi mona boma, yandi funguka, mpe bana ya Nge ke luta na lweka yankaka ya nsilulu ya mamvimpi ya mbote. Pesa yawu, Tata. Mu ke na kufidisa yawu kukatuka nzutu ya munu tii na bawu, na Nkumbu ya Yesu Klisto.

<sup>167</sup> Mu me nata kimvuka yayi na ntwala ya Nge, na nzila ya lukwikilu mu ke na kunata bawu na ntwala ya autel ya nkembo ya Nzambi kuna na Mazulu. Samu na nionso yina bawu ke na yawu nsatu samu na kubela ya bawu, nionso yina kele ya yimbi na bawu, nionso yina kele ya yimbi na baluzingu ya bawu mpe nionso, Nzambi, sukula bawu, kumisa bawu ya Nge. Belusa bawu, Tata. Mpe bika ti Ngolo yina basisaka Yesu na ntoni, kuvutula luzingu na banzutu ya bawu ya kufwa mpe kukumisa



bawu bantu ya mona na Klisto. Pesa bawu mamvimpi ya mbote mpe ngolo samu na kusadila Nge.

<sup>168</sup> Bambuka moyo na munu, O Mfumu. Mu kele kisadi ya Nge. Sadisa munu, na yina mu ke na nsatu ya lusambulu. Mpe mu ke na kusambila ti Mpeve-Santu kutwadisa beto mpe kusadila beto, mpe kunata beto tii kilumbu beto ke mona Yesu Klisto na Kwizulu ya Yandi ya nkembo ntangu beto ke kutana Yandi na zulu na Enlevement. Na Nkumbu ya Klisto beto me lomba yawu. Amen.

Mu zola Yandi, mu . . . (Beno mpe?)  
Samu Yandi zolaka munu ntete  
Mpe mu zwaka mpulusu ya munu  
Na yinti ya Calvaire.

<sup>169</sup> Awa, kana beno lendaka zola ve yina beno me mona, wapi mutindu beno ke zola Yandi Yina nabunu beno mona? Ntangu yayi na yina beto ke na kuyimba *Mu Zola Yandi*, bika beto pesa mbote ya luzolo na mpangi yina kele pene-pene ya beto.

Mu zola Yandi, . . .

Nzambi kusakumuna nge...?...Nzambi kusakumuna nge...?...Nzambi kusakumuna nge...?...Nzambi kusakumuna nge, Mpangi Neville...?...Uh-huh. Nzambi kusakumuna nge...?...

Na yinti ya Calvaire.

Na ntangu yayi beto telemisa maboko ya beto na Yandi.

Mu zola Yandi, mu zola Yandi  
Samu Yandi zolaka munu ntete  
Mpe mu zwaka mpulusu ya munu  
Na yinti ya Calvaire.

<sup>170</sup> Mukunga mosi ya mbote, beno zola kuwa mosi? Mu me bakula ti beto kele awa na ntwadisi ya mikunga ya mulongi yina me katuka na Indianapolis. Mu ke banza ti yandi ke yimbaka na Cadle Tabernacle. Ya kele yina? Mbote mingi, tata. Yina kele kisalu ya yandi na Cadle Tabernacle. Bantu yikwa lenda kubambuka moyo na E. Howard Cadle? Oh, la la! Nzambi kusakumuna mwela ya yandi ya mfunu. Ndinga yina mu vwandaka zola kuwa, kento yina mu zolaka kuwa kuyimba, kulutila muntu nionso yina mu kuwaka kuyimba na luzingu ya munu, ya vwandaka Mama Cadle, kuyimbaka, “Ntete nge basika na kivinga ya nge na suka yayi, nge banzaka na kusambila na Nkumbu ya Klisto Mvulusi ya beto, ti yandi vwanda Kinwanunu ya beno ya kisengo bubu yayi?”

<sup>171</sup> Kaka awa na lweka yankaka ya bala-bala kuna na suka mosi, na mwa yinzo mosi ya bivinga zole, mu me telema, mu vwanda belama samu na kusala tiya. Four vwanda pesa tiya ve. Mpe mu vwanda meka na kunamisa yawu, mpe mupepe vwanda sala, kufula mpe kufilisa bima na kizizi ya munu. Mpe

madidi vwandaka, mpe nzutu bandaka kukangama na madidi. Mpe mwa mvula ya mpembe vwanda bisika nionso na ntoto, mpe mu vwandaka makulu mwasi; na kumeka kunamisa mwa four yayi ya nkulu, na mwa tiyo ya four. Mpe mu . . . Meda na munu vwanda me kwelana ntama mingi ve. Mpe mu vwandaka meka, bankuni vwandaka na masa mpe lendaka ve kubaka tiya, mpe mu vwandaka ya kuvwanda kuna, mu me banza, “Oh, la la! Mu ke meka yawu diaka.” Mu fwana kwenda na kisalu, mpe mu vwandaka salaka mupepe na four yayi ya nkulu mutindu *yayi*. Mpe mu me telemisa diboko mpe mu me fungula ladyo, mpe yandi me banda na kuyimba, “Ntete nge basika na kivinga ya nge na suka yayi, nge banzaka na kusambila,” mu me kubwa na ntoto, “na Nkumbu ya Klisto Mvulusi ya beto, ti yandi vwanda Kinwanunu ya nge ya kisengo bubu yayi?” Oh, wapi mutindu mu zola kuwa kento yina!

<sup>172</sup> Ntangu mu ke sabuka lweka yankaka ya nzadi mbala mosi, mu banza ti mu ke kuwa Mama Cadle ya kuvwanda kuna. Beno zaba, ntangu nionso mu ke salaka dilaka. Na lweka yayi ya nzadi, ya kele na Yinti yina ke vwandaka kaka nkunzu, beno zaba, Yinti ya Luzingu; mpe kuna na lweka yankaka ya nzadi, ya kele na chorale ya Bawanzio yina ke yimbaka ntangu mpe mpimpa, samu ti kuna ya kele ve na mpimpa, bawu ke yimbaka kilumbu nionso, beno me mona. Mu ke kuzwa kisika mosi mpe mu ke vwanda na manima mpe kuwa yawu. Mu banza ti mu ke kuwa Mama Cadle kuyimba kuna.

<sup>173</sup> Nzambi sakumuna mpangi ya beto ya bakala. Mu me zimbana nkumbu ya yandi. Ya kele yinki, mpangi-bakala? [Mpangi-bakala me tuba, “Ned Woolman.”—Mu.] Mpangi Ned Woolman ke yimba samu na beno na ntangu yayi. Mpangi Woolman, beto kele na kiese na kuyamba beno awa na nkokila yayi. [Mpangi Woolman ke na kuyimba *Tempelo Ya Ntima Ya Munu*.]



*NTWADISI* KNG62-1014E  
(A Guide)

Nsangu yayi ya Mpangi William Marrion Branham, kulongamaka na Kingelesi, na nokila ya Lumingu na kilumbu ya 14 ya Ngonda ya kumi ya mvula 1962, na Branham Tabernacle, na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)